

周

禮

正

義

周禮正義卷七十二

瑞安孫詒讓學

小行人掌邦國賓客之禮籍以待四方之使者禮籍名位尊卑之書使者諸侯之臣使來者也疏掌邦國賓客之禮籍以待四

方之使者者賈疏云大行人待諸侯身小行人待諸侯之使者其邦之禮籍則諸侯及臣皆在焉注云禮籍名位尊卑之書

者名位尊卑謂若九儀上下之差著於冊籍者卽掌訝邦國之等籍是也說文竹部云籍簿書也左成二年傳云晉侯使鞏朔獻捷於周王以鞏伯宴而私賄使相告之曰非禮也勿籍杜注云籍書也案左傳說非禮勿籍明凡協禮者無不著於籍矣云使者諸侯之臣使來者也者卽後文大客小客是也賈疏云卽

時聘殷覲是也令諸侯春入貢秋獻功王親受之各以其國之籍禮之貢六服所貢也功考績之功也秋獻之若今計文書斷於九月其舊法疏令諸侯春入貢秋獻功者謂小行人以令布之邦國使依時入貢獻功與大司馬職方氏爲官聯也大司馬云施貢分職以等邦國此春入者卽彼所施之貢秋獻者卽彼所分之職有職則有功也此皆於聘覲之外歲時使使者來諸侯不親其事賈疏云此云貢卽大宰九貢是歲之常貢也必使春入者其所貢之物並諸侯之國出稅於民民稅旣得乃大國貢半次國三之一小國四之一皆市取美物必經冬至春乃可入王以是令春入之也秋獻功者物皆秋成諸侯亦法秋故秋獻之案賈說大國次國小國所貢之數卽據大司徒注五等國

所食之數言之其說未瑯詳大司徒疏又案此入貢獻功分屬春秋蓋遠近畿侯甸諸服言之其距王國較遠者或可一時并獻故射義云古者天子之制諸侯歲獻注云歲獻獻國事之書及計偕物也此貢卽計偕物功卽國事之書蓋因秋獻并入春貢故書貢得同時偕至斯亦王者綏懷遠方之微指矣林喬蔭云諸侯之於天子也有歲事有時事歲事者君親行之大宗伯朝覲宗遇會同以其或一歲一行或數歲一行故爲歲事商頌云歲事來辟勿予禍適是也時事者遣使達於天子小行人令諸侯春入貢秋獻功王親受之以其行於春秋二時故爲時事左傳僖十二年管仲曰若節春秋來承王命襄二十六年韓宣子曰晉士起將歸時事於宰旅皆是也云王親受之者明諸侯

雖不親來王則親受之示重其事通其情也云各以其國之籍禮之者謂以禮待其使者也賈疏云卽上所掌禮籍尊卑多少不同 注云貢六服所貢也者六服卽大行人侯甸男采衛要六服有貢物之法穀梁桓十五年傳云古者諸侯時獻於天子以其國之所有卽此春入貢也賈疏云對九州外之二服無此貢也云功考績之功也者謂其政治之成也書舜典云三年考績僞孔傳云三年有成故以考功案依此經之義則諸侯比歲獻功與唐虞之制三年考績法異而義同春秋繁露考功名篇云考績之法考其所積也天道積聚眾精以爲光聖人積聚眾善以爲功考試之法大者緩小者急貴者舒而賤者促諸侯月試其國州伯時試其部四試而一考天子歲試天下三試而一

考前後三考而紂陟命之曰計案此諸侯比歲獻功卽董子所謂天子歲試天下也云秋獻之若今計文書斷於九月其舊法者惠棟云續漢志劉昭注廬植曰計斷九月因秦以十月爲正故凡諸侯入王則逆勞于畿鄭司農云入王朝於王也故春秋傳曰宋公不王又曰諸侯有王王有巡狩疏凡諸侯入王則逆勞于畿者諸侯來至距王城五百里之畿則小行人爲使往勞之也其禮以覲禮約之當亦皮弁用璧如郊勞之禮據大行人云上公三勞侯伯再勞子男一勞則畿勞之禮蓋唯上公有之侯伯子男並無也覲禮賈疏謂五等同有畿勞非也黃以周云聘禮覲禮皆主侯伯中諸侯言經曰郊勞不曰畿勞則畿勞非五等諸侯之通制可知矣小行人云凡者統下郊勞胝館等言

有畿勞則逆之爲上擯有郊勞胝舘諸事則承之爲承擯此小行人之通例也賈疏誤會小行人文故於覲禮聘禮並不可通案黃說是也互詳大行人疏國語周語云敵國賓至行理以節逆之左傳僖三十年孔疏引賈逵云理吏也小行人也是逆賓爲小行人之通職又詁土云邦有賓客則與行人送逆之則諸侯有畿勞者其歸小行人當亦送至於畿邇不言者文不具也

注鄭司農云入王朝於王也者大行人云諸侯之王事是也凡諸侯見於天子並謂之王詩曹風下泉云四國有王鄭箋云有王謂朝聘於天子也國語周語云荒服者王又云有不王則修德魯語云先王制諸侯使五年四王周語韋注云王王事天子也互詳大行人疏云故春秋傳曰宋公不王者左隱九年傳

文賈疏云不王不宗觀於王案賈所述蓋賈服義杜注云不共王職與先鄭義異非引又曰諸侯有王王有巡守者左莊二十三年傳曹劌語賈疏引左傳注云有王朝於王案此亦賈服義杜注云王從王事亦非及郊勞眡館將幣爲承而擯視館致館也承猶承也王使勞賁於郊致館於賓至將幣使宗伯爲上擯皆爲之承而擯之疏及郊勞眡館將幣爲承而擯者三事皆此官爲承擯也郊勞兼遠郊近郊公侯伯備有二郊勞子男唯有近郊勞而已眡館以下則五等諸侯通有之注云視館致館也者視舊本並作眡今據蜀石經正凡經例用古字作眡注例用今字作視詳大宰疏致館卽覲禮之賜舍也館舍義同據王言之謂之賜據使者言之謂之眡謂之致其事一也賈疏云聘

禮及下司儀皆云致館故同之也云眠者使卿大夫往眠觀其
可否云致者致使有之云承猶承也者大戴禮記保傅篇云博
聞強記接給而善對者謂之承承者承天子之遺忘者禮藝文
類聚職官部引風俗通云承者承也是承承義通說文収部云
承翊也左哀十八年傳說楚使子國帥師請承杜注云承佐也
此承摺亦所以佐上摺而翊贊之者與肆師佐儋義同也丁晏
云聘禮大夫爲承摺大戴朝事作承摺古承丞通用云王使勞
賓於郊者觀禮云至于郊王使人皮弁用璧勞注云郊謂近郊
去王城五十里小行人職曰凡諸侯入王則逆勞于畿則郊勞
者大行人也依鄭彼注則郊勞小行人從大行人也云致館於
賓者觀禮天子賜舍注云以其新至道路勞苦未受其禮且使

卽安也賜舍猶致館也所使者司空與小行人爲承擯然則既館小行人從司空也云至將幣者賈疏云謂至廟將幣三享云使宗伯爲上擯者大宗伯云朝覲會同則爲上相注云出接賓曰擯入詔禮曰相是上擯卽上相也賈疏云惟謂將幣時大宗伯爲上擯於郊勞及謁館二者不使大宗伯爲上擯者以其使者或大行人官卑何得使大宗伯爲擯也當別遣餘官爲上擯小行人爲承擯而言宗伯爲上擯者取宗伯成文爲將幣而言也方苞云國語周語敵國賓至卿出郊勞覲禮王賜侯氏命諸公奉篚服則郊勞宜使卿劉台拱云諸公相爲賓郊勞致館皆主君親之王雖不親行亦當使卿然則此二事皆大行人爲上擯小行人爲承擯歟案方劉說近是鄭覲禮注謂司空致館大

司空卽卿也以次差之自當大行人爲上擯惟彼注謂郊勞使
大行人則中大夫也以聘禮郊勞使卿例之天子勞來朝諸侯
不當殺於彼鄭賈說似未塙若然郊勞亦使卿大行人爲上擯
其小行人爲承擯則同云皆爲之丞而擯之者丞蜀石經作承
案通郊勞既館將幣而言此小行人爲承擯皆謂四時朝覲其
會同則肆師爲承擯詳彼疏凡四方之使者大客則擯小客則
受其幣而聽其辭擯者擯而見之王使得親言也受其幣者受
之以入告其所爲來之事疏大客則擯者大行人云凡諸侯之
王事實賓而見之賓擯字通此爲侯國使臣之王事禮殺故小行
人擯見之賈疏云大客則大行人云大客之儀一也彼鄭云大
賓要服以內諸侯大客謂其孤卿則此大客爲要服以內諸侯

之使臣也云小客則受其幣而聽其辭者大行人注云蕃國其君爲小賓臣爲小客又謂蕃國君無朝貢之歲則其臣亦無聘覲大禮可知據大行人云若有四方之大事則受其幣聽其辭此小客蓋亦以大事特來告者以其禮殺故小行人受幣聽辭也 注云擯者擯而見之王使得親言也者賈疏云則時聘殷覲之時行旅擯入見王王與使之親言也云受其幣者受之以入告其所爲來之事者大行人注謂蕃國君無玉瑞則臣來亦無玉此幣蓋亦束帛之屬詳彼疏此則小行人聽其辭以轉達於王明王不親見也此小客卑於九州內之大客故禮彌殺不得擯見王賈疏謂蕃國使臣是夷人不能行禮故直聽其辭而已義未咳使適四方協九儀賓客之禮朝覲宗遇會同君之禮

也存規省聘問臣之禮也適之也協合也疏使適四方協九儀

者謂小行人自奉使而往邦國也賈疏云自此以下皆是小行人使適四方之事使適四方向諸侯之國所至之國則合九等之儀九儀則上大行人九儀命者五爵者四是也云賓客之禮者卽大宗伯之賓禮亦與彼爲官聯也云朝覲宗遇會同君之禮也存規省聘問臣之禮也者此君專指邦國之君臣則通王臣及侯國之臣言之賈疏云存規省三者天子使臣撫邦國之禮聘問二者是諸侯使臣行聘時聘殷規問天子之禮其禮已備於上小行人略言之也注云適之也者說文辵部云適之也宋魯語適卽適之隸變云協合也者大史注同達天下之六節山國用虎節土國用人節澤國用龍節皆以金爲之道路用

旌節門關用符節都鄙用管節皆以竹爲之此謂邦國之節也
達之者使之四方亦皆齎法式以齊等之也諸侯使臣行覲聘
則以金節授之以爲行道之信也虎人龍者自其國象也道路
謂鄉遂大夫也都鄙者公之子弟及卿大夫之采均之吏也凡
邦國之民遠出至他邦他邦之民若來入由國門者門人爲之
節由關者關人爲之節其以徵令及家徙鄉遂大夫及采地吏
爲之節皆使人執節將之以達之亦有期以反節管節如今之
竹使符也其有商者通之以符節如門關門關者與市聯事節
可同也亦所以異於畿內也凡節有天子法式存於國疏達天
下之六節者與掌節爲官聯也此與下成六瑞合六幣並卽大
行人達瑞節之事賈疏云此經亦是適四方之事言達天下之

六節者據諸侯國而言掌節所云據畿內也虎節人節龍節三者據諸侯使臣出聘所執旌節符節管節三者據在國所用

注云此謂邦國之節也者賈疏云對掌節所掌者兼主王國之節也云達之者使之四方亦皆齋法式以齊等之也者與大行人注義同六節有法式必齊等乃可以通行天下故此官主贊大行人以法式達之四方也云諸侯使臣行覲聘則以金節授之以爲行道之信也者掌節注云使卿大夫聘於天子諸侯行道所執之信也則此覲聘兼諸侯聘天子及自相聘言之賈疏云知是使臣行所執者見掌節云凡邦國之使節山國用虎節故知此亦使臣所執也諸侯身行不須節以其尊著故不須也按掌節云守邦國者用玉節注云謂諸侯於其國中玉節之制

如王爲之以命數爲大小此不達玉節者文略耳亦達可知云
虎人龍者自其國象也者掌節注云山多虎平地多人澤多龍
以金爲節鑄象焉必自以其國所多者於以相別爲信明也所
謂自其國象也云道路謂鄉遂大夫也者掌節注同此謂邦國
鄉遂之吏鄉射禮注謂小國鄉大夫一命州長士不命以此推
之則大國次國鄉大夫再命州長士一命其遂大夫以下各降
於鄉一等可遞推也五等侯國制鄉遂詳大司馬疏賈疏云按
掌節注變鄉遂言道路者容公邑大夫及小都大都之吏今此
旌節中何知不亦容都鄙之吏而以都鄙吏在管節中者彼都
鄙用角節文在上當直是都鄙之主此都鄙用管節最在下明
都鄙吏在其中若然邦國之中都鄙主及吏同用管節矣案賈

說是也依掌節注公邑用節與采邑同此經都鄙吏既別用管節則公邑吏當與鄉遂大夫同鄭不言者文不具也云都鄙者公之子弟及卿大夫之采地之吏也者此公爲五等諸侯之通稱侯國君之子弟亦食大都卿大夫亦食小都及家邑與王國同唯所食里數則依國大小降殺不等其置采吏亦同也云凡邦國之民遠出至他邦他邦之民若來入由國門者門人爲之節由關者關人爲之節者掌節注云凡民遠出至于邦國邦國之民若來入由門者司門爲之節由關者司關爲之節彼注據王民出至邦國邦國民入至王畿而言此注據邦國之民自相出入爲言其事則同此云門人卽司門關人卽司關也云其以徵令及家徙鄉遂大夫及采地吏爲之節者掌節注義同謂國

內往來不由門關則有地治之吏授之節也依鄭賈義則徵令
家徙在鄉遠者鄉遠大夫爲之旌節在都鄙者則采地大夫爲
之管節與畿內采邑之吏亦用旌節者異也云皆使人執節將
之以達之者賈疏云比長云邦之民徙於郊則從而授之明皆
將送使達前所也云亦有期以反節者亦據掌節文云管節如
今之竹使符也者管節蓋截竹爲節若樂器之管漢竹使符亦
以竹爲之故舉以爲況詳掌節典瑞疏云其有商者通之以符
節如門關門關者與市聯事節可同也者明商與民同用符節
也賈疏云掌節云貨賄用璽節門關用符節各別司關旣言掌
國貨之節以聯門市門市節旣相聯此中無貨賄用璽節明同
用符節可知故爲此解也詒讓案門關與市聯事卽司關所云

聯門市亦卽大宰之官聯也聯當從黃丕烈校改連詳大宰司
關疏云所以異於畿內也者賈疏云畿內貨賄用璽節門關用
符節畿外同用符節是異也云凡節有天子法式存於國者猶
王國之節有法式藏於掌節也成六瑞王用璜圭公用桓圭侯
用信圭伯用躬圭子用穀璧男用蒲璧成平也瑞信也皆朝見
所執以爲信疏成六瑞者與典瑞爲官聯也賈疏云此亦通四
方若然諸侯國無鎮圭因言之六瑞玉人所造典瑞之令小行
人直平知得失而已不言達六瑞者諸侯受命已得之不令別
作法式以齊故不言達也云王用璜圭者段玉裁云天府璜凡
國之玉鎮注故書鎮作璜鄭司農云璜讀爲鎮此璜字正同不
注者省文互見案六瑞名制並詳大宗伯疏注云成平也者

調人注同謂平其文璫及尺寸等大行人注云平其僭踰者也
云瑞信也者春官敘官典瑞注云瑞符信也云皆朝見所執以
爲信者典瑞注云人執以見曰瑞凡鎮圭王執以祭天地宗廟
及朝日夕月等桓圭以下皆五等諸侯朝見王及自相朝所執
其聘問用瑒圭不得用此六瑞也合六幣圭以馬璋以皮璧以
帛琮以錦琥以繡璜以黼此六物者以和諸侯之好故合同也
六幣所以享也五等諸侯享天子用璧享后用琮其大各如其
瑞皆有庭實以馬若皮皮虎豹皮也用圭璋者二王之後也二
王後尊故享用圭璋而特之禮器曰圭璋特義亦通於此其於
諸侯亦用璧琮耳子男於諸侯則享用琥璜下其瑞也凡二王
後諸侯相享之玉大小各降其瑞一等及使卿大夫覲聘亦如

之疏合六幣圭以馬璋以皮者此圭璋卽玉人之琖圭璋與六瑞之圭璧不琖者異六玉形制並詳大宗伯疏凡皮馬與幣對文則幣專爲幣帛通言之則皮馬亦爲幣故校人云飾幣馬國語齊語云桓公使諸侯罷馬以爲幣韋注云幣圭以馬也此並以馬爲幣是也賈疏謂圭以馬璋以皮二者本非幣帛以用之當幣處故總號爲幣乃沿鄭校人注之誤詳彼疏云璧以帛琖以錦者亦玉人之琖璧琖也說文帛部云錦襄邑織文也案帛謂璧色帛及立纁詳大宗伯疏孔廣森云六幣帛先於錦攷之禮典皆大事用帛小事用錦如聘禮享以束帛私覲以束錦公食大夫侑以束帛大夫相食侑以束錦冠禮醴賓酬以束帛昏禮賓從者酬以束錦大氏古人尙純於幣亦然錦有雜文斯次

帛之下矣凌廷堪云束帛則加璧不錦則加琮琮下璧一等則束錦亦下束帛一等也云琮以縞璜以黼者縞黼並刺帛成文詳畫纁疏 注云合同也者廣雅釋詁同謂玉與幣各相合同不得差舛也云六幣所以享也者謂朝禮畢後享獻之幣卽大行人說五等諸侯皆廟中將幣三享是也賈疏云對上文六者是朝時所用也云五等諸侯享天子用璧享后用琮其大各如其瑞者賈疏云玉人云璧琮九寸諸侯以享天子注云享獻也聘禮享君以璧享夫人以琮引此者欲明后用琮故覲禮享天子云束帛加璧是其施於天子也不言享后文不具言九寸據上公而言明侯伯子男皆如瑞知子男享天子亦用璧琮者覲禮揔稱侯氏用璧明五等同也案賈說是也聘禮注云君享用

璧夫人用琮天地配合之象也此享王用璧后用琮義與彼同
大各如其瑞者公用璧琮九寸侯伯用璧琮七寸子男用璧琮
五寸各依其瑞玉之尺度不降也又依鄭此注義則凡公非二
王後享王后亦用璧琮不得用圭璋左傳昭五年孔疏申此注
義謂凡公享王並圭以馬享后並璋以皮非鄭悞也云皆有庭
實以馬若皮者賈疏云按覲禮三享皆束帛加璧庭實唯國所
有奉束帛匹馬卓上九馬隨之中庭西上是其以馬也聘禮奉
束帛加璧享庭實皮則攝之是其用皮也聘禮記曰皮馬相閒
可是也詒讓案鄭言此者欲見公以下至子男享玉幣之外仍
以皮馬之等爲庭實也鄭聘禮記注云閒猶代也土物有宜君
子不以所無爲禮畜獸同類可以相代依鄭彼注義則庭實皮

馬隨所有而用之是用圭享者亦可用皮用璋享者亦可用馬
此經圭馬璋皮文取相配實可互用也其璧琮琥璜亦以皮馬
爲庭實覲禮聘禮璧以帛仍有皮馬是也老子云雖有拱璧以
先駟馬亦據庭實言之云皮虎豹皮也者聘禮注義同黃以周
云郊特牲虎豹之皮示服猛也束帛加璧往德也皆據享禮爲
文凡享禮諸侯自相爲及聘賓於其君皆用虎豹不獨享天子
爲然也聘禮享有庭實皮則攝之鄭注皮虎豹之皮是聘賓用
虎豹之證也聘賓享諸侯用虎豹皮則諸侯自相爲亦可知矣
若聘賓覲諸侯及諸侯之待使臣則用麋鹿皮鄭聘禮注凡君
於臣臣於君麋鹿皮可也臣於君謂私覲庭實設四皮及介以
儷皮君於臣謂使者歸君使卿贈如覲幣及食饗以侑幣酬幣

庭實皆有皮大夫於大夫亦用麋鹿皮鄭注賓問卿云庭實設四皮麋鹿皮是也然則用虎豹皮者諸侯禮故諸侯以之享天子聘賓以之享諸侯用麋鹿皮者大夫禮故主國之君以之待聘賓聘賓亦以之私覲以之問卿大夫案黃說甚覈周書王會篇云參方立繚壁虎豹皮十二亦諸侯享王庭實用虎豹皮之證左襄四年傳無終子嘉父使孟樂如晉因魏莊子納虎豹之皮以請和諸戎管子輕重甲篇云發朝鮮不朝請文皮貍服而以爲幣平淮南子道應訓云散宜生得立豹黃羆青紆白虎文皮于台以獻於紂高注云文皮虎豹之皮也爾雅釋地云東北之美者有斥山之文皮焉郭注云虎豹之屬皮有縹緗者是也管子小匡篇又云桓公知諸侯之歸已也故使輕其幣諸侯以

纁帛布鹿皮四介以爲幣齊以文錦虎豹皮報國語齊語亦載其事彼用鹿布爲國幣者乃桓公故殺其禮以示厚往薄來實非正法賈聘禮疏謂齊語爲臣聘君降於天子用麋鹿皮非也云用圭璋者二王之後也二王後尊故享用圭璋而特之者賈疏云按玉人璧琮九寸諸侯以享天子言九寸則上公之禮上公用璧琮則圭璋是二王後明矣言而特之者惟有皮馬無束帛可加故云特如是皮馬不上堂陳於庭則皮馬之外別有庭實可知詒讓案左昭五年傳云享覲有璋蓋亦據二王後享后言之鄭知用圭璋而特之者以經云璧以帛琮以錦琥以繡璜以黼帛錦繡黼黼以外仍有庭實之皮馬此圭璋直云皮馬不云帛錦繡黼明惟有皮馬更無他幣故知其特也引禮器曰圭璋

特者彼注云圭璋特朝聘以爲瑞無幣帛也云亦通於此者謂
禮器本據朝聘所用圭璋而言不謂享玉然此享玉之圭璋但
有皮馬無所加之幣帛則亦可謂之特是禮器之義可通於此
也書康王之誥云皆布乘黃朱寶稱奉圭兼幣曰一二臣衛敢
執壤奠孔疏引鄭注云此幣圭以馬蓋舉王者之後以言耳諸
侯當璧以帛亦有庭寶云其於諸侯亦用璧琮耳者亦謂二王
後與平諸侯同也賈疏云見玉人職云璪琮八寸諸侯以享夫
人明享君用璧琮八寸是下享天子一寸如是明二王後相享
不可同於天子用圭璋則用璧琮可知言是兩公自相朝二王
後稱公是於諸侯還同二王後可知詒讓案依此注義則公侯
伯自相享用璧帛享夫人當用琮錦而聘禮受享束帛加璧夫

人立纁束帛加琮彼聘享夫人亦用琮而合以帛者或聘享與朝享不同與云子男於諸侯則享用琥璜下其瑞也者賈疏云觀禮子男已入侯氏用璧琮中則此琥璜不知何用二王後自相享退入璧琮則子男自相享退用琥璜可知且子男朝時用璧自伯享降一等故用琥璜案此經上四玉並爲享幣故鄭賈以此琥璜亦爲享幣而禮器云琥璜爵鄭注云天子酬諸侯諸侯相酬以此玉將幣也聘禮注說同是又爲酬幣矣詩小雅鹿鳴孔疏兼取此文說之云天子酬諸侯以繡黼而琥璜將之今攷饗禮酬幣雖無文然據公食大夫禮侑幣以束帛饗禮隆於食禮而六幣之差繡黼卑於帛錦則天子酬諸侯雖用琥璜或不合以繡黼若如孔說是禮隆而幣轉殺差次違舛殆未足

焉也云凡二王後諸侯相享之玉大小各降其瑞一等者等蜀石經作寸賈疏云玉人云瑋琮八寸諸侯以享夫人禮重無用八寸之法明是上公九寸降一等至八寸上公既降一寸則侯伯子男各降一等可知二王後相朝敵無用相尊之法明亦降一寸見子男者雖退入琥璜亦降一寸可知若然知五等諸侯自相朝圭璋亦如其命數其相享璧琮等則降一寸知者玉人云璧琮八寸諸侯以享夫人據上公會不云圭璋朝所執者明圭璋自朝天子所執故聘禮云所以朝天子圭與纁皆九寸上公之玉也問諸侯朱絲纁八寸注云於天子曰朝於諸侯曰問記之於聘文互相備以此上公爲然侯伯子男可知也案依鄭賈說則二王後及上公相享用璧琮八寸侯伯相享用璧琮六

寸子男相享用琥璜四寸各降其璜一等也云及使卿大夫覲聘亦如之者賈疏云直言覲聘亦如之不分別享與聘則聘享皆降一等同故玉人云瑑圭璋八寸璧琮八寸以覲聘此據上公之臣圭璋璧琮皆降一等其餘侯伯子男降一寸明矣其子男之臣享諸侯不得過君用琥璜可知若國札喪則令賻補之若國凶荒則令賻委之若國師役則令槁贈之若國有福事則令慶賀之若國有禍裁則令哀弔之凡此五物者治其事故故書賻作傳槁作橐鄭司農云賻補之謂賻喪家補助其不足也若今時一室二戶則官與之棺也橐當爲槁謂槁師也立謂師役者國有兵寇以匱病者也使鄰國合會財貨以與之春秋定五年夏歸粟於蔡是也宗伯職日以論禮哀國敗賜裁水火疏

周禮正義

禮七十二

十一卷 樂學社本

五百四十八

若國札喪則令賻補之者以下並以凶禮嘉禮令侯國交相往來之事與大宗伯爲官聯也大戴禮記朝事篇文並同賈疏云此文雖皆單言國亦據諸侯而言按宗伯云以喪禮哀死亡此云國札荒則令賻補之不同者彼據弔葬致哀此據設財物補其不足相包乃具也云若國凶荒則令賻委之者大司徒注云賻者謂禮物不備相給足也委與委積義同賻委謂相給致其委積也賈疏云宗伯云以荒禮哀凶札不同者言哀凶札者自貶損故曲禮云歲凶年穀不登君膳不祭肺之類是也此云賻委者令他人以財賻委之亦相包乃成也云若國師役則令槨贈之者葉鈔釋文槨作槨羣書治要同案槨卽槨之俗賈疏云但凶禮有五惟不見恤禮以義差之當於師役中兼之云若國

有福事則令慶賀之者賈疏云嘉禮有六此惟言賀慶一者其飲食冠昏賓射饗燕之法皆當國自行非是相交通之物故此不言之宗伯嘉禮歸賑膳此不見者諸侯無自相歸賑膳法故也云凡此五物者治其事故者此與下經並云五物與大司徒鄉三物事異而義同彼注云物猶事也此五者並侯國邦交之餘事此官皆以法令治之 注云故書賻作傅者賻傅聲類同

段玉裁云司農從今書作賻其實傳可訓爲附益說文不收賻字案段說是也云稿作稟者舊本作稿爲稟蜀石經作稿作稟今案稿稟並誤字惟作字與釋文合不誤上云賻作傅則此不宜別云爲矣今據正稟舊本及石經並誤今依宋本作稟阮元云釋文稿贈苦報反作稟古老反宋本錢鈔本載音義稟皆作

稟與地官敍官石經合按釋文稿肅苦報反作稟苦老反本自明白之甚禾稟字切古老與枯稿字切苦浩稿勞字切苦報迥不同也學者不知音紐分別乃如治絲而棼矣此經故書作禾稟字鄭本作稿肅从木稿卽稟也案阮說最析此經故書作從禾之稟先鄭讀爲從木之稿與地官敍官正圖但彼正文仍從故書作稟此經則徑改作稿小異耳單行本釋文出作稟二字其作字是也稟則傳寫之誤陸書凡音古老反者皆從禾之稟若從木之稿則無古老之音稿尤爲俗體皆不足據也詳地官敍官疏鄭司農云賻補之謂賻喪家補助其不足也者從今書作賻釋之旣夕禮云知死者贈知生者賻鄭彼注云賻之言補也助也貨則曰賻白虎通義崩薨篇云賻者助也所以相佐助

給不足也貨財曰賻此國札喪則官以貨財給有喪之家亦所以補助其不足故謂之賻補大戴禮記王言篇云優袒以補不足是也賻互許宰夫疏云若今時一室二尸則官與之棺也者亦舉漢法爲況云稟當爲槁謂槁師也者地官敘官稟人先鄭注讀同大戴禮記朝事篇亦作槁卽先鄭所據也稟舊本並誤稟今依上文正槁蜀石經及舊本並誤槁今依岳本正阮元云槁本上聲槁勞則讀去聲猶勞本平聲勞來則讀去聲也淺人乃別製槁字鄭注無此從牛之槁案阮說亦是也凡槁師字鄭並作從木之槁詳地官敘官及牛人疏云立謂師役者國有兵寇以匱病者也者國因被兵寇而致財匱民病卽所謂國敗之等是也云使鄰國合會財貨以與之者大宗伯注說禴禮云同

盟者合會財貨以更其所喪是也云春秋定五年夏歸粟於蔡是也者春秋經文引之者證師役槁禴之事大司徒注亦引此文詳彼疏引宗伯職日以禴禮哀圍敗者圍敗蜀石經作國敗案大宗伯疏引馬本作國敗此引之者明此槁禴與彼義同亦證師役爲有兵寇之事也云禴裁水火者大宗伯注義同大戴禮記朝事篇裁作災古今字此注例用今字亦當作災詳膳夫疏及其萬民之利害爲一書其禮俗政事教治刑禁之逆順爲一書其悖逆暴亂作慝猶犯令者爲一書其札喪凶荒厄貧爲一書其康樂和親安平爲一書凡此五物者每國辨異之以反命于王以周知天下之故慝惡也猶圖也疏及其萬民之利害爲一書者謂若職方氏掌辨邦國之人民周知其利害及山師

川師所辨皆爲一書也賈疏云此總陳小行人使適四方所采風俗善惡之事云其禮俗政事教治刑禁之逆順爲一書者禮俗與大宰八則六曰禮俗以馭其民同土均云以和邦國都鄙之政令刑禁與其施舍禮俗喪紀祭祀皆以地燾惡爲輕重之濫而行之掌其禁令是禮俗等四者皆土均以王命令侯國所守以爲治者此官察其順命與否而爲一書也云其悖逆暴亂作慝猶犯令者爲一書者說文言部云詩亂也重文悖諄或從心暴經例用古字當作諄詳地官敘官疏朝事猶作欲義同此察邦國民志之不順者若匡人匡邦國而觀其慝是也鄭詩魯頌譜說魯君云其有大罪侯伯監之行人書之似卽本此經若然此五物所書雖主於民亦兼及國君與云其札喪凶荒厄貧

爲一書者此陳民之疾苦也厄卽屨之聲譌一切經音義引荅
類篇云屨因也鄉師遺人作藉阮字同鄉師注云藉阮饑乏也
厄貧亦謂民貧乏不能自存故與札凶同書云其康樂和親安
平爲一書者此紀民之和樂也云凡此五物者每國辨異之以
反命于王以周知天下之故者朝事辨作別義同故作政形近
而誤謂五事各自爲總編又以每國別異其子目也都宗人注
云反命還白王賈疏云各各條錄別爲一書以報上也詒讓案
漢書食貨志云孟春之月行人振木鐸徇于路以采詩獻之大
師比其音律以聞於天子故曰王者不窺戶牖而知天下方言
劉歆與揚雄書說周道人以歲八月巡路采代語僮謠歌戲又
雄答書云嘗聞先代輔軒之使奏籍之書皆藏於周秦之室輪

軒之使卽行人此五物之書卽翰軒使者奏籍之書也蓋大則獻五物之書小則采詩及代語僮謠歌戲與大行人屬象胥諭言語協辭令屬瞽史諭書名聽聲音事略相類諸書所言與此經足互相備此云周知天下之故亦猶班云不窺戶牖而知天下矣適人卽行人互詳殺官疏 注云慝惡也者胥師注同詩

大雅民勞云無俾作慝毛傳亦訓爲惡云猶圖也者神仕注同司儀掌九儀之賓客擯相之禮以詔儀容辭令揖讓之節出接賓曰擯人贊禮曰相以詔者以禮告王疏掌九儀之賓客擯相

之禮者九儀見大行人疏謂五等諸侯紹擯贊大宗伯小行人也賈大宗伯大行人疏謂五等諸侯紹擯皆爲士案殺官此官胥爲上中士疑士擯卽此官也云以詔儀容辭令揖讓之節者

儀容卽下文行人之儀及保氏六儀賓客之容是也辭令卽大
行人之辭命注云六辭之命也揖讓卽下文土揖時揖天揖及
三讓之等三者皆有尊卑隆殺之節此官掌其法以詔王也

注云出接賓曰摯入贊禮曰相者大宗伯注義同賈疏云摯卽
下文之摯而在門外是也相下文入廟唯上相入是也云以詔
者以禮告王者大宰注云詔告也賈疏云卽下云詔王儀是也
將合諸侯則令爲壇三成宮旁一門合諸侯謂有事而會也爲
壇於國外以命事宮謂墼土以爲牆處所謂爲壇墼宮也天子
春帥諸侯拜日於東郊則爲壇於國東夏禮日於南郊則爲壇
於國南秋禮山川丘陵於西郊則爲壇於國西冬禮月四瀆於
北郊則爲壇於國北旣拜禮而還加方明於壇上而祀焉所以

教尊尊也。覲禮曰：諸侯覲於天子，爲宮方三百步，四門，壇十有二尋，深四尺，是也。王巡守殷國，而同則其爲宮亦如此。與鄭司農云：三成三重也。爾雅曰：丘一成爲敦丘，再成爲陶丘，三成爲昆侖丘，謂三重。疏：將合諸侯，則令爲壇三成者，大戴禮記朝事篇文略同。此掌王大會同之禮，合諸侯兼大行人時會殷同二者而言。令爲壇，謂諸侯既朝於廟，王將命政事於壇，則司儀以法令掌舍爲之。賈疏謂封人爲壇，蓋亦兼令之也。云宮旁一門者，掌舍云：掌王之會同之舍，爲壇，壝宮，棘門。此宮卽壝宮，門卽棘門。四方方有一門也。注云：合諸侯謂有事而會也者，鄭意會合義同。卽大宗伯所云：時見曰會也。實則經亦含殷見曰同言之。知非四時朝覲者，以朝覲常禮皆於廟行之，不別爲壇也。

有事而會左昭三年傳文大宗伯注亦引彼文爲說詳彼疏云爲壇於國外以命事者於舊本並作于今據蜀石經正大宗伯注云諸侯有不順服者王將有征討之事則既朝覲王爲壇於國外合諸侯而命事焉是也賈疏云宮方三百步明在國外也言命事則上大行人云時會以發四方之禁禁卽九伐是其事也云宮謂壇土以爲牆處所謂爲壇壇宮也者蜀石經及宋大字本並無下爲字掌舍壇壇宮注云謂王行止宿平地築壇又委壇土起壘塼以爲宮覲禮注云宮謂壇土爲塼以象牆壁也焦循云蓋四面壅土爲矮牆每方之中闕之作門鄭云諸侯入壇門是也詒讓案覲禮注謂壇土爲塼象牆壁則與宮室之牆不同故云爲牆處周書王會篇說成周之會墀有內臺中臺外

臺營牆卽壇及墼牆也互詳掌舍疏云天子春帥諸侯拜日於東郊則爲壇於國東夏禮日於南郊則爲壇於國南秋禮山川上陵於西郊則爲壇於國西冬禮月四瀆於北郊則爲壇於國北者釋爲壇所在之地禮月下蜀石經及宋大字本並有與字觀禮云天子乘龍載大旂象日月升龍降龍出拜日於東門之外禮日於南門外禮月與四瀆于北門外禮山川上陵於西門外鄭注云此謂會同以春夏秋冬也又云爲宮者於國外春會同則於東方夏會同則於南方秋會同則於西方冬會同則於北方說與此同賈彼疏云四方之壇並宜在四郊之內以其拜日之等於近郊退來就壇明壇在近郊之內但去城不知遠近或四方皆依成數東方八里南方七里西方九里北方六里四

方此其定分案職方王會同或出畿在諸侯之國故職方氏令諸侯共待之事則無常數案四時壇異方及四時分祭之說經無正文鄭賈蓋以意推之敖繼公謂四時會同皆爲壇墠宮於國門外之南方以受朝又謂禮日以下三禮與拜日相屬而舉之東門南門北門西門卽壇墠宮之四門並與鄭義異金鶚云覲禮及司儀皆但言爲壇並不言隨時而設于其方鄭說於經無據且王必南鄉司儀明言之則壇必在南可知若在東方西方北方王將東鄉西鄉北鄉乎若亦南鄉則皆不正矣又云覲禮經文並無春夏秋冬字朝事儀言天子師諸侯朝日亦不言春是四時皆同也蓋均是諸侯安得以時而異其禮如鄭說是諸侯春夏會同者待之隆秋冬會同者待之輕此何說邪且春

但拜日而夏則祀日又何說邪夫天神莫尊於日而月則稍卑山川丘陵則更卑矣秋時會同第帥之以祭山川丘陵何其卑視之邪惟四時皆並祭大小兼行斯無隆殺之嫌耳案菽金之說於禮似通孫經世說亦同但四體同時並舉恐非一日所能畢事而拜日禮日一日之間兩有事於日則又嫌煩瀆禮經簡略無可質證今兩存以俟攷云既拜禮而還加方明於壇上而祀焉者並據親禮爲說方明詳大宗伯司盟疏賈觀禮疏據大戴禮記朝事篇唯言朝日不言祀方明謂邦國有疑則有盟事朝日既畢乃祀方明若無疑王帥諸侯朝日而已無祀方明之事今審釋此注鄭意似謂無論盟否並先祀方明賈說非也云所以教尊尊也者據朝事篇文賈疏云言教尊尊者天子親自

拜日禮日之等是尊尊之法教諸侯已下尊敬在上者也引觀
禮曰諸侯覲於天子爲宮方三百步四門壇十有二尋深四尺
是也者覲禮經未附載會同之禮與此事同故引以爲證鄭彼
注亦云四時朝覲受之於廟此謂時會殷同也案彼云宮方三
百步卽所謂壇也四門卽此旁一門謂於壇旁面各爲一門四
旁則四門也壇廣深之度詳後疏又案此合諸侯之宮卽覲禮
諸侯覲天子之宮或謂亦稱明堂荀子彊國篇云築明堂於塞
外而朝諸侯楊注云塞外境外也明堂壇也謂巡狩至方岳之
下會諸侯爲宮方三百步四門壇十有二尋深四尺加方明於
其上左氏傳築王宮於踐土亦其類也金鶚云古者壇墼皆謂
之宮掌舍爲壇墼宮其證也壇墼易成故將會同則令爲之若

明堂宮室豈一時可爲邪況四岳明堂爲布政之宮朝會之所
有天下必早建之何待巡狩之日諸侯畢覲而始爲之乎案金
說旻也此經及覲禮朝事儀言壇宮者皆不云明堂盛德言明
堂則不云壇明其非一處也盛德宮方三百步之文雖與覲禮
偶合然彼上文盛陳堂室戶牖之制則非壇壇宮明甚孟子齊
宣王曰人皆謂我毀明堂史記封禪書泰山東北趾古時有明
堂處此泰山之明堂蓋西周遺跡亦當有堂室故齊宣王欲毀
之若僅方三百步之壇埒四尺露處之壇則東遷至戰國已數
百年無不隕隤之理何勞議毀況此經將合諸侯則令爲壇覲
禮亦言覲而爲宮明皆臨時封築禮畢則不復修治豈有常在
岱麓久而不毀者乎攷之於經明堂亦有會同明堂位所說是

也然惟東都及四岳有之且非常禮若常時在國則合諸侯而助祭率於明堂合諸侯而會盟率於壇宮助祭之禮尊祖配天故於明堂舉宗祀之典會盟之禮質信明神故於壇宮設方明之祀其事異其禮異故其地亦異不可傳合爲一也漢書律曆志引古文伊訓云伊尹祀于先王者宗祀之禮也又云誕賁有收方明者合諸侯而盟因祀方明也二事蓋不同處而漢志載劉歆說謂冬至祀先王於方明以配上帝似卽擬明堂方明爲一其說疏謬與經不合古者南郊與方岳皆有明堂其四堂五室八个之制當同必無以壇壝爲明堂者楊說不足據也二王巡守殷圓而同則其爲宮亦如此與者明會同禮不異也巡守者謂王十二年巡守邦國至方嶽合當方諸侯覲禮注云王巡

守至於方嶽之下諸侯會之亦爲此宮以見之是也殷國而同者大行人有殷同卽大宗伯之殷見曰同謂王不巡守則六服諸侯來見也職方氏及大行人掌客別有殷國鄭謂卽與殷同爲一故此注云殷國而同今案殷國者王不巡守出在邦國而合諸侯與殷同禮雖同而一在畿外一在國城外其事迥異鄭此注及職方氏注並提而一之賈疏亦謂殷國就王國左右爲壇如時會並誤詳職方氏疏鄭司農云三成三重也者廣雅釋詁云成重也後鄭覲禮注引此經而釋之亦同先鄭義案壇實四成云三成者上一成卽堂不數也引爾雅曰上一成爲敦上再成爲陶上三成爲昆命上謂三重者釋上文蜀石經敦作頓昆侖作崑崙宋大字本亦作崑崙郭本爾雅作敦上崑崙上案

敦釋文音頓石經疑涉陸音而誤毛詩衛風氓傳及釋名釋土
亦作頓上崑崙卽昆侖之俗大宗伯注亦作崑崙此注釋文自
作昆侖今本不誤此引以證三成爲三重之義爾雅郭注亦訓
成爲重與鄭義同詔王儀南鄉見諸侯土揖庶姓時揖異姓天
揖同姓謂王既視方明諸侯上介皆奉其君之旂置于宮乃詔
王升壇諸侯皆就其旂而立諸公中階之前北面東上諸侯東
階之東西面北上諸伯西階之西東面北上諸子門東北面東
上諸男門西北面東上王揖之者定其位也庶姓無親者也土
揖推手小下之也異姓昏姻也時揖平推手也衛將軍文子曰
獨居思仁公言言義其聞詩也一日二復白圭之玷是南宮綽
之行也夫子信其仁以爲異姓謂妻之也天揖推手小舉之

詔王儀南鄉見諸侯土揖庶姓時揖異姓天揖同姓者大戴禮
記朝事篇云天子南鄉見諸侯土揖庶姓時揖異姓天揖同姓
所以別親疎外內也賈疏云詔告也謂諸侯各就位立王在壇
亦立司儀乃告王降壇南向見諸侯乃揖之金鶚云覲禮天子
不下堂而見諸侯會同與覲禮相似故載在覲禮中必不降至
壇下而見諸侯也司儀云爲壇三成王南鄉見諸侯可知天子
不下壇也案金說近是此經及覲禮皆無王降壇揖諸侯之文
鄭覲禮注云諸侯入壇門或左或右各就其旂而立王降階南
鄉見之三揖賈彼疏謂據燕禮大射公降揖羣臣使定位故知
王亦然亦以在壇會同與覲異此疏亦約覲禮注爲說此蓋鄭
以意推定本非定論黃以周亦謂覲禮與此注升壇之說兩岐

是也竊謂此經揖在擯前蓋王既升壇諸侯始入門尙在壇下各就左右而立王卽於壇上遙揖之王揖以後乃設擯以升諸侯王不必降壇也蓋王立壇中南鄉以每等各二步計之距壇下不過八步從上揖下尙不嫌其太遠儻稍前臨堂貼則尤近矣如是則與此經及覲禮皆無不合於理或有當乎 注云謂

王既祀方明諸侯上介皆奉其君之旂置于宮乃詔王升壇諸侯皆就其旂而立者于注例當作於各本並誤賈疏云按覲禮云諸侯覲于天子爲宮方三百步四門壇十有二尋深四尺加方明于其上上介皆奉其君之旂置于宮尙左公侯伯子男皆就其旂而立四傳擯天子乘龍載大旂象日月升龍降龍出拜日于東門之外反祀方明注引朝事儀曰天子冕而執鎮圭尺

有二寸纁藉尺有二寸摺大圭乘大路建大常十有二旒樊纁
十有二就貳車十有二乘帥諸侯而朝日於東郊所以教尊尊
也退而朝諸侯由此二者言之已祀方明乃以會同之禮見諸
侯也若然覲禮上介奉君之旂置于宮尙左及公侯伯子男就
其旂而立并四傳擯者並陳設其位其立當在祀方明後是以
彼下文乃始云拜日之禮及祀方明之事故彼置旂于宮之下
注云置于宮者建之豫爲其君見王之位也是其未卽位也此
鄭注依次第而言故云謂王既祀方明諸侯上介皆奉其君之
旂置于宮乃詔王升壇諸侯皆就其旂而立也詒讓案此祀方
明後將行會同表位及諸侯始入境門之事必建旂者左昭十
一年傳所謂會有表也鄭以覲禮先言拜日後言反祀方明朝

事先言朝日後言退朝諸侯參互定之知祀方明在拜日之後朝諸侯又在祀方明之後故王制孔疏申鄭義云既告至之後爲宮加方明於壇天子出東門外拜日反祀方明祀方明之後乃徹去方明未祀方明之前未有見諸侯之事皇氏以爲未祀方明之前已見諸侯非也賈覲禮疏義與孔同案以此經及覲禮朝事記覲之諸侯既告至當先特朝於廟既一一朝畢王乃總率以拜日祀方明乃升壇行會同之禮未祀方明以前止有特見於廟未有旅見於壇之事皇侃所謂見諸侯者謂旅見也以爲在祀方明之前則亦在拜日之前矣此與覲禮朝事並不合孔氏糾之是也云諸公中階之前北面東上諸侯東階之東西面北上諸伯西階之西東面北上諸子門東北面東上諸男

門西北面東上者覲禮注亦同大戴禮記朝事篇說會同禮王
南鄉見諸侯後云公侯伯子男各以其旂就其位諸公之國中
階之前云云與此文同故鄭據以爲說明堂位及周書明堂篇
說周公朝諸侯於明堂之位亦與此同依此注說則大會同之
位與常朝覲異覲禮云諸侯前朝皆受舍于朝同姓西面北上
異姓東面北上此常朝覲位也會同之位與彼異故覲禮說會
同禮亦云公侯伯子男皆就其旂而立明其敘爵而不分同姓
異姓檀弓注云朝覲爵同同位卽謂此也經言二等揖者蓋於
同爵之中又以同姓異姓庶姓分列上下王則每爵各爲二等
揖耳至曲禮云天子當依而立諸侯北面而見天子曰覲天子
當寧而立諸公東面諸侯西面曰朝彼諸公尊而東面諸侯卑

而西面者疑王每日常朝之位與朝覲會同又異詳大宗伯疏黃以周云覲禮前朝受舍同姓西面北上異姓東面北上受舍卽受次會同之受次與朝覲同同姓西面異姓東面西面者在王之左同姓爲先亦尙左也王未升壇之時諸侯當先出次俟立同姓西面異姓東面故王南鄉見之得施土時天三揖既揖之後王升壇諸侯皆入門就旂而立於是有諸公中階之前北面東上諸位及其四傳擯諸侯各執玉而前見王於是公上等侯伯中等子男下等之位東上卽尙左三等亦尙左也朝事儀云天子南鄉見諸侯土揖庶姓云云又公侯伯子男各以其旂就其位諸公之位中階之前北面東上云云又及其將幣也公於上等云云其列位之異同先後之次第皆班班可考矣鄭注

以就旂而立在于王南鄉三揖之前非特三揖無所施與朝事儀
文顯背案黃據朝事記糾鄭義亦得通云王揖之者定其位者
賈疏云此約燕禮云卿大夫皆入門右北面立公降階揖之卿
得揖東廂西面大夫得揖中庭少進北面其位乃定此王揖亦
得揖乃定有少別者彼諸侯揖臣臣皆北面得揖就位此五等
立已在位王揖之逡巡而已位乃定是其別也云庶姓無親者
也者爾雅釋詁云庶眾也庶姓猶言眾姓謂異姓之無親者對
下時揖異姓爲異姓之有親者也左隱十一年傳云薛庶姓也
與此義同大傳云庶姓別於上則以同姓五世親盡者爲庶姓
與此別云土揖推手小下之也者說文手部云揖讓也一曰手
箸臂曰揖讓推也鄉飲酒禮云主人揖眾賓賓厭介介厭眾賓

鄭彼注云賓之屬相厭變於主人也推手曰揖引手曰厭今文皆作揖江永云古人之揖如今人之拱手而推之高則爲天揖平則爲時揖低則爲土揖也推手爲揖引手爲撻又謂之厭黃以周云拱手小下曰土揖土揖下衡也案江黃說是也凌廷堪朱大韶說並同拱手有推手引手之分推手者推而致於前引手者引而斂於側也禮古文分爲二字今文則並作揖說文揖字前一義卽所謂推手曰揖後一義卽所謂引手曰厭許從今文也推手小下之則向下謂之士揖土卽地也對向上爲天揖言之云異姓昏姻也者大宗伯注云異姓王昏姻甥舅詳彼疏云時揖平推手也者平推手適當上下之中故謂之時揖上法天下法土中法四時也黃以周云拱手當心曰時揖時揖平衡

也引衛將軍文子曰以下者賈疏云此大戴禮文引之證有異姓之事也按大戴禮云衛將軍文子問子貢曰蓋受教者七十有餘人聞之孰爲賢子貢對之麻陳諸子行遂陳南宮縚之行此乃子貢之辭而云衛將軍文子曰者引篇名耳案賈說是也大戴禮記盧注云南宮縚魯人也字子容云謂妻之也者釋大戴禮義明與此經異姓同大戴禮盧注云以爲異姓謂以兄之子妻之也亦用鄭義但鄭舉此證唯見異姓爲王女下嫁之國實則外女來嬪亦其比例故大傳注云異姓謂來嫁者也二注各偏舉一隅足互相備也云天揖推手小舉之者推手小舉之則向上故謂之天揖也黃以周云拱手小舉曰天揖天揖上衡也及其擯之各以其禮公于上等侯伯于中等子男子下等謂

執玉而前見於王也擯之各以其禮者謂擯公者五人侯伯四
人子男三人也上等中等下等者謂所奠玉處也壇三成深四
尺則一等一尺也壇十有二尋方九十六尺則堂上二丈四尺
每等丈二尺與諸侯各於其等奠玉降拜升成拜明臣禮也既
乃升堂授王玉疏及其擯之各以其禮者姜兆錫云擯者王既
揖而設擯以升諸侯即覲禮記四傳擯也金鶚云各以其禮即
謂公於上等侯伯於中等子男於下等也案姜金說是也此經
專說擯儀禮即謂三等尊卑之次經文於擯儀之外絕不及幣
玉鄭賈以授玉爲釋非也云公于上等侯伯于中等子男于下
等者謂先見公於庭交擯傳辭訖上擯則升壇立於上等以擯
詔之也次見侯伯則上擯立於中等終見子男則上擯立於下

等其儀並放此蓋交擯時本陳擯介於庭既傳辭則上擯當升壇相禮觀禮雖不言其所立之處以聘禮授玉時上擯立中庭推之則觀禮侯氏入門時上擯亦立中庭可知侯氏既入門右卽奠圭是奠玉亦於庭也此會在壇侯氏奠玉則升壇各於其等是常觀上擯所立之位與侯氏奠玉同在庭會同則上擯所立之位與侯氏奠玉同於壇上三等足相比例也況侯氏奠玉降拜之時上擯當謁侯氏延之升拜於其等則立亦各於其等固其宜矣 注云謂執玉而前見於王也者阮元云釋文出見王二字則於當爲衍文詒讓案鄭不知此經所言爲擯儀下經將幣乃爲授玉故設謂此經爲奠玉送玉各於其等之事下經將幣則別爲三享也云擯之各以其禮者謂擯公者五人侯伯

四人子男三人也者並據大行人文觀禮云四傳擯彼注云王
 既揖五者升壇設擯四傳擯者每一位畢擯者以告乃更陳列
 而升其次公也侯也伯也各一位子男俠門而俱東上亦一位
 也王揖諸侯之後乃陳擯者觀禮注云至庭乃設擯則諸侯初
 入門王官之伯帥之耳是王揖諸侯升壇之後乃陳擯與此經
 敘次正同傳擯卽大行人及後諸公相爲賓之交擯也但此經
 所云各以其禮者當依金鶚說卽謂五爵三等之差鄭以爲擯
 者之數非經義也云上等等下等者謂所奠玉處也者據觀
 禮云侯氏入門右坐奠圭鄭彼注云卑者見尊奠桴而不投但
 覲禮在廟不爲壇則奠玉於庭此在壇則於三等壇奠玉與彼
 異也云壇三成者深四尺則一等一尺也者此合上文及覲禮

參互推校堂及三等深廣之度也鄭觀禮注云深謂高也從上
向下曰深賈疏云一等爲一尺發地一尺上有三成爲三尺總
四尺也詒讓案公羊莊十三年何注云土基三尺土階二等曰
壇蓋無發地一尺與觀禮不合不足據云壇有十二尋方九十
六尺者觀禮注云八尺曰尋十有二尋則方九十六尺也案方
九十六尺卽十六步也宮方三百步壇居其中則自壇至墻每
面各百四十二步也云則堂上二丈四尺每等丈二尺與者觀
禮注云三重者自下差之爲三等而上有堂焉堂上方二丈四
尺上等中等下等每面十二尺案此堂謂土堂也上無屋與宮
室之堂異周書王會篇云成周之會墀上張赤帟陰羽天子南
面立唐叔荀叔周公在左大公望在右旁天子而立于堂上是

會同之壇有堂之證賈疏云上二丈四尺爲堂王立之處并祝方明之所黃以周云堂上方二丈四尺加上等每面十二尺其方四十八尺又加中等每面十二尺其方七十二尺又加下等每面十二尺其方九十六尺云諸侯各於其等奠玉降拜升成拜明臣禮也卽鄭所據覲禮云侯氏入門右坐奠圭再拜稽首擯者謁侯氏坐取圭升致命王受之玉侯氏降階東北面再拜稽首擯者延之曰升升成拜乃出案凡禮之通例君臣行禮臣皆堂下再拜稽首君待臣以客禮下拜則辭之然後升成拜此王待諸侯以不純臣禮故亦命升成拜也又鄭覲禮注說會同禮云其奠瑞玉及享幣公拜於上等侯伯於中等子男於下等擯者每延

之升堂致命王受玉撫玉降拜於下等然則奠玉與升成拜同等降拜則各下奠玉一等所云降拜於下等者謂每下一等不定爲壇之下等故賈疏云公奠玉於上等降拜於中等侯伯奠玉於中等降拜於下等子男奠玉於下等降拜於地及升成拜皆於奠玉之處言成拜者鄉於下拜之時王使人辭下拜之不成故於升乃更成前拜故云成拜是敬上之禮故云明臣禮也案賈卽依覲禮注義聶崇義亦從賈釋而引別說云或可降拜者皆降於地升成拜於奠玉之處也其說與鄭賈異黃以周亦云子男之升成拜尙在下等則降拜爲降拜於地矣案黃從聶氏別說是也凡禮例升拜必於堂降拜必於庭壇宮則以平地爲廷壇三成皆堂也中下二等雖卑於上等然仍是堂而非廷

如鄭賈說則公侯伯降拜皆於堂於例乖迂足明其非也云既乃升堂授王玉者賈疏云禮法禮敵並授禮不敵者訝受此行臣禮則諸侯皆北面授之於堂上也王既受玉約聘禮亦當側授宰玉此壇上無站不得取明堂位崇圻亢圭爲義也詒讓案依覲禮則侯氏先奠玉再拜擯者辭以王欲親受侯氏則由左升授王玉乃降拜以送玉擯者又延之升乃升成拜則降拜升成拜在升堂授王玉後鄭以拜亦爲送玉故先云降拜升成拜後云既乃升堂授王玉禮之節次實不如是也又案授玉卽正行朝禮凡會同之禮皆先朝於廟後朝於壇兩次行之故大宗伯注說時會云既朝覲王爲壇於國外合諸侯以命事說殷同亦云六服盡朝朝禮既畢王亦爲壇合諸侯以命政是也依此

三民書局

受享益見矣金鶚云古者玉幣皆謂之幣將幣指瑞玉而三享亦在其中鄭專指享言非也案姜金說是也此將幣卽謂王受玉之時侯氏貢玉及升成拜皆各於其等之上如前注所說也凡此經言將幣者八大史云大會同朝覲及將幣之日執書以詔王大行人說五等諸侯朝覲之禮云廟中將幣三享文凡三見此職後諸公相爲賓之禮云及將幣交擯三辭又諸公之臣相爲國客之禮云及將幣旅擯三辭掌誦說有國賓客云及將幣爲前驅與此文而入皆據朝聘授玉之正禮言之也此職後文兩言將幣鄭皆以授玉爲釋與享別自是的解掌誦掌幣爲前驅注云道之以如朝則亦以爲授玉之先可知大史將幣鄭無注案彼文云將幣之日凡授玉與享同日而授玉在享之先

且以禮言之授玉爲朝聘之正禮亦重於享則將幣之日自指授玉之日可知賈疏於彼專以享爲釋非經注義也至大行人及此節之將幣則鄭並以爲三享然大行人以將幣與三享並舉明將幣爲授玉與享爲二事姜氏引朝事儀先云將幣後云貢圭證此經是授玉非享尤爲證據塙鑿鄭誤謂授玉時貢拜之節已在上文損見內故不得以此將幣爲享而不知其與全經通例不合也又案會同之享在壇以觀禮約之當亦各貢幣於其等升致命於堂王撫玉侯氏降拜於下惟不升成拜於其等耳享亦有玉幣但其禮輕於授玉故經舉將幣以咳享也云禮謂以鬱鬯裸之也者大行人注義同云皆於其等之上也亦如上貢玉分就二等也凡授玉及享諸侯貢玉貢幣及拜送

皆各於其等王受玉撫玉自於堂也其裸禮則大宗伯酌獻諸侯受禮升拜受幣及酢王皆各於其等據大宰大行人注王親拜送及受酢當下堂就所禮賓之等阼階上行之與受玉享王不下堂異也**王燕則諸侯毛**謂以須髮坐也朝事尊尊上爵燕則親親上齒鄭司農云謂老者在上也老者二毛故曰毛疏王燕則諸侯毛者釋文云毛劉本作耄音毛案耄毛字亦通此謂合諸侯而燕也諸侯蓋通同姓異姓庶姓言之毛詩小雅常棣傳云王與親戚燕則尚毛彼卽中庸之燕毛亦卽文王世子族燕之禮與此不同常棣孔疏謂此經亦謂同姓諸侯則卽大宗伯所謂以飲食之禮親宗族兄弟者賈疏又謂此燕卽掌客之公三燕侯伯再燕子男一燕以經考之二說皆非也此經乃專

據王合諸侯而燕與平時燕諸侯羣臣不同若是同姓族燕則經又不宜概稱諸侯絕無別異之文矣蓋王合諸侯而饗禮在掌客彼注謂公侯伯子男盡在此燕亦五等諸侯盡在而其禮則貴齒而不尚爵若饗禮則以爵爲獻數故掌客云諸侯長十有再獻注云獻公侯以下如其命數二禮所尚不同亦禮貴相變也凡燕皆在寢此合諸侯而燕亦然 注云謂以須髮坐也

者中庸云燕毛所以序齒也鄭彼注云燕以髮色爲坐說文毛部云毛眉髮之屬及獸毛也國語齊語云班序顛毛以爲民紀統章注云顛頂毛髮也言次列頂髮之白黑使長幼有等又楚語注云毛須髮也云朝事尊尊上爵者賈疏云依爵尊卑爲先後云燕則親親尚齒者賈疏云此乃不問爵之尊卑取以年齒

爲先後也詒讓案親親者言與諸侯歡燕所以示親愛常棣疏據此注以證其燕同姓之說非鄭指也鄭司農云謂老者在上也老者二毛故曰毛者先鄭說與後鄭同檀弓不獲二毛鄭注云二毛鬢髮斑白左傳僖二十二年杜注云二毛頭白有二色凡諸公相爲賓謂相朝也疏凡諸公相爲賓者以下並諸侯在國待來朝之君之禮此官亦掌其儀節隨時頒而攷之注云謂相朝也者卽大行人云世相朝是也此據諸公自相朝之禮其侯伯子男朝公及自相朝則待賓之禮各視其爵而降殺焉主國五積三問皆三辭拜受皆旅擯再勞三辭三揖登拜受拜送賓所停止則積閒闊則問行道則勞其禮皆使卿大夫致之從來至去數如此也三辭辭其以禮來於外也積問不言登受

之於庭也鄭司農云旅讀爲旅於大山之旅謂九人傳辭相授
於上下竟問賓從未上行介還受上傳之立謂旅讀爲鴻臚之
臚臚陳之也賓之介九人使者七人皆陳擯位不傳辭也賓之
上介出請使者則前對位皆當其末擯焉三揖謂庭中時也拜
送送使者疏主國五積三問者此賓入竟以後之禮賓大行人
疏謂問勞同處則諸公三問者謂入竟問遠郊問近郊問也凡
積問及勞皆受於舍館或亦爲帷宮以行禮五等諸侯相爲賓
積問之禮差並詳大行人掌客職云皆三辭拜受者拜經例用
古字當作擇石經及各本並誤下並同詳春官世婦疏三辭謂
上介辭禮於舍門外拜受謂賓親受幣於舍館之庭以聘禮覲
禮推約之蓋使者於堂下東面致命賓則西面拜受也云皆旅

賓者此朝君待主國卿大夫故用臣禮也云再勞者謂入竟勞遠郊勞也并後主君近郊勞爲三勞與問數同但問禮輕主君不親故立文不同此再勞禮亦當旅賁經不言者冢上文省又依覲禮聘禮朝賓受勞訖亦當有賁使者之節經文皆不具也云三辭三揖者亦辭禮於門外旣入門則於庭中三揖云登拜受拜送者此則使者登堂東面致命賓則於東階上北面拜受幣主國之使不拜送幣禮畢使者出則賓於門內西面拜送使者使者亦不荅拜聘禮注云凡爲人使不當其禮是也 注云賓所停止則積者謂致牢禮米禾薪芻有饌陳之積也大戴禮記朝事篇云諸侯相朝之禮委積之以其牢禮之數所以別義也賈疏云謂遣人云十里有廬廬有飲食二十里有宿宿有委

五十里有市市有積是也云閒闊則問者謂中間閒闊無禮事則問訊之也其禮蓋殺於勞孤卿大夫則無問直有勞而已云行道則勞者謂以方在道路故勞其勤苦也云其禮皆使卿大夫致之者賈疏云按聘禮遣卿行勞禮臣來尙遣卿勞明君來遣卿勞可知此再勞一勞在境一勞在遠郊皆使卿其近郊勞當主君親爲之也其積問當使大夫故下句云致殯如致積之禮注云俱使大夫禮同也知致殯使大夫者見聘禮宰夫朝服設殯宰夫卽大夫問亦小禮明亦使大夫也案賈說非也大戴禮記朝事篇云君使大夫迎于境卿勞于道則境勞當使大夫左傳隱十年孔疏亦云勞禮遠郊使卿竟首使大夫與朝事合致殯亦疑當使卿詳後疏云從來至去數如此也者明經云五

積三問再勞爲來去之通數也大行人云上公之禮出入五積
注云出入謂從來訖去也案上公五積疑當來三去二但經注
無文無可質證要來去止此數賈大行人疏謂來去皆五積非
是其三問再勞等據此經蓋並來有去無故左昭五年傳云入
有郊勞出有贈賄明問勞專爲來時之禮去別有贈送與問勞
異也云三辭辭其以禮來於外也者謂賓辭主國之使以禮來
致積與問勞也士冠禮注云禮辭一辭而許再辭而許曰固辭
三辭曰終辭不許也若然此經皆三辭而許故不曰終辭矣云
外者以賓所居之舍爲內故以使來爲外云積問不言登受之
於庭也者別於再勞登拜受爲受之於堂也聘禮說受勞之禮
云迎于舍門之外再拜賓揖先入受于舍門內勞者奉幣東面

致命賓北面聽命再拜稽首受幣鄭彼注謂侯伯之臣不受於堂此諸公受稽問於庭約如彼侯伯臣受勞之禮亦於舍門內之庭也但此賓爲朝君則與彼臣禮不同蓋當使者東面致命賓則西面拜受幣不北面亦無稽首也鄭司農云旅讀爲旅於大山之旅者季氏旅於泰山論語八佾篇文先鄭謂旅擯亦傳辭此蓋讀旅爲臚而訓爲傳也詳後云謂九人傳辭相授於上下竟問賓從未上行介還受上傳之者九人專據公之介言之不云使介或當如後鄭說七人也此謂公介九人以次傳辭相授而下問賓之末介受之以次傳而上告於問賓問賓又以荅辭授上介以次傳而下公之末介又受之以次傳而上至上介乃入告公如下文交擯也賈疏云此先鄭以爲旅擯與交擯同

之後鄭不從者此臣禮云旅擯下文云主君郊勞交擯三辭明其別旅直陳擯介不傳辭交則一往一來傳辭也劉台拱申先鄭義云交擯傳辭旅擯亦傳辭叔孫通傳大行設九賓臚句傳賓與擯臚與旅古今字也蘇林曰上傳語告下爲臚下告上爲句莊周曰大儒臚傳然則臚擯猶傳擯也聘義曰介紹而傳命君子於其所尊弗敢質敬之至也又曰三讓而後傳命安在其不傳辭哉黃以周云合讀先鄭各注旅之言臚臚之言傳旅擯者眾擯臚傳其辭也以經記覈之當以先鄭爲長如聘用旅擯司儀有明文而聘義則曰介紹而傳命論語君召使擯亦爲聘禮而皇侃等釋揖所與立亦以爲擯傳辭有左右揖此皆旅擯傳辭之明據也案先鄭釋旅擯與後鄭不同劉黃並申先鄭義

而劉謂旅接交擯皆傳辭以先鄭前後注義覈之似劉說近得其情但經凡君與臣行禮皆旅擯兩君行禮則皆交擯是旅擯之禮必殺於交擯事無可疑如劉申先鄭說則是全無區別信有未安今攷覲禮啇夫承命及四傳擯爲交擯之禮聘禮聘享諸節並賓與擯面相交言爲旅擯之禮是旅擯不傳辭後鄭義合於經殆不可易聘義及論語皆廣論擯介之事固不容拘執矣至此經致積問在道朝賓與主使所陳皆依介數不依擯數故先鄭謂公介九人後鄭後注又謂使者介七人斯乃在道與在國不同二鄭義本無異也互詳後疏云立謂旅讀爲鴻臚之臚臚陳之也者爲蜀石經作如誤案旅臚聲近字通續漢書百官志云大鴻臚卿一人中二千石賈疏云按爾雅釋詁云尸旅

陳也釋言云豫臚敘也注云皆陳敘也後鄭不從旅大山之旅從臚者欲取敘義也段玉裁云後鄭云不傳辭但陳之而已故讀爲臚臚陳之也後鄭意下文交擯乃是傳辭陳壽祺云士冠禮注古文旅作臚漢書敘傳大夫臚岱鄭氏曰臚岱季氏旅於泰山是也師古曰臚旅聲相近其義一耳史記六國表位在藩臣而臚於郊祀卽臚岱也然則先鄭亦讀旅若臚後鄭恐人不知旅於泰山之旅音臚故引伸之非與先鄭有異也案陳謂旅泰山之旅亦通作臚是也但後鄭論語注今佚此章義無可攷漢書敘傳顏注訓臚岱爲陳與後鄭此注義合然先鄭實詁旅爲臚句傳之臚不爲陳訓二鄭讀雖略同義不能強合也云賓之介九人者據大行人上公介九人與先鄭說同若侯伯則介

七人子男則介五人云使者七人者以其爲主國之臣也賈疏云自從降二等之禮案鄭賈亦據大行人義此專屬諸公之使言之若侯伯之使則五人子男之使則三人亦並依介數不依擯數公五侯伯四也云皆陳擯位不傳辭也者別於傳擯有傳辭也凡賓禮君於臣則旅擯聘禮說諸侯於聘賓旅擯之法云擯者出請事注云擯謂主國之君所使出接賓者也於是時賓出次直闕西北面上擯在闕東闕外西面其相去也公之使者七十步侯伯之使者五十步子男之使者三十步此旅擯耳不傳命上介在賓西北東面承擯在上擯東南西面各自次序而下末介末擯_三爲相去三丈六尺上擯之請事進南面揖賓俱前賓至末介上擯至末擯亦相去三丈六尺止揖而請事還入告

于公此三丈六尺者門容二徹參个旁加各一步也此卽旅擯之禮唯上擯與聘賓相間對餘擯介皆陳位不傳辭也呂飛鵬云聘禮諸侯於聘賓則旅擯此經云諸公相爲賓而亦旅擯者五積二問再勞皆使卿大夫致之故也云賓之上介出請使者則前對位皆當其末擯焉者末擯卽所謂末介也請使者直闕西北面公之上介在闕東闕外西面使者之上介在使者西北東面公之次介在上介東南西面各自次序而下公之末介與使者末介東西相直公之上介進南面揖使者俱前使者至其末介公之上介至其末介各三丈六尺止公之上介揖而請事使者則對如聘禮旅擯之位也云三揖謂庭中時也者賈疏云如聘禮入門揖當曲上當碑揖是也詒讓案此請進至舍館之

庭中時表記云故君子三揖而進一辭而退是也禮之通例凡入門將左右曲揖則當門內雷也將北曲揖則當陳也當碑揖則於堂下三分庭一在北也三揖地不同而皆在庭中故云謂庭中時云拜送送使者者謂禮畢使者出賓拜送使者於大門內也凡禮之通例送賓主人尊者皆於大門內也經文拜送與拜受相次嫌其爲使者拜送幣故特釋之主君郊勞交擯三辭車逆拜辱三揖三辭拜受車送三還再拜主君郊勞備三勞而親之也鄭司農云交擯三辭謂賓主之擯者俱三辭也車逆主人以車迎賓於館也拜辱賓拜謝辱也立謂交擯者各陳九介使傳辭也車逆拜辱者賓以主君親來乘車出舍門而迎之若欲遠就之然見之則下拜迎謝其自屈辱來也至去又出車若

周禮正義 禮七十二

聖一 楚定國學社本

五百四十九

欲遠送然主君三還辭之乃再拜送之也車送迎之節各以其等則諸公九十步立當車轅也三辭重者先辭辭其以禮來於外後辭辭升堂疏主君郊勞者此賓至近郊之禮覲禮說侯氏受郊勞云侯氏皮弁迎于帷門之外再拜注云郊舍狹寡爲帷宮以受勞又左襄二十八年傳云子產相鄭伯以如楚舍不爲壇杜注云至敵國郊除地封土爲壇以受郊勞是受郊勞當爲壇及唯宮也云交擯三辭車逆拜辱者此兩君始相見用敵禮也三辭亦賓主之介傳辭辭禮車逆拜辱則賓親迎主君而拜其辱此皆於舍門外行之賈疏云此當近郊勞交擯者主君至郊郊有館舍賓在內主君至館大門外主君北面而陳此九介去門九十步東面賓在大門內於門外之東亦陳九介西面賓

陳五楨者非主君從賓禮故也車迎拜辱者傳辭既訖賓乘車
出大門迎主君至主君處下車拜主君屈辱自至郊也云三揖
三辭者賓主同入門於庭中三揖至階則三辭讓升也此賓主
敵三讓則賓先升以道主君聘禮注云凡升者主人讓於客三
敵者則客三辭主人乃許升是也云拜受者賓主既登堂賓則
於東階上北面拜受幣也賈疏云賓再拜乃受幣主君亦當拜
送不言省文也云車送三還再拜者此亦賓於舍門外乘車送
主君也賓拜送主君亦不答拜賈疏云賓乘車出門就主君若
欲遠送之三還者主君見賓送已三還辭之再拜者賓見主君
辭遂再拜送主君也 注云主君郊勞備三勞而親之也者大
戴禮記朝事篇云君親郊勞大行人云上公三勞此上文止有

再勞至此主君身自郊勞乃備三勞之數且益親之也彼王待
來朝諸侯使大行人勞王不親行故直云三勞文不別也鄭司
農云交擯三辭謂賓主之擯者俱三辭也者先鄭後注云交擯
擯者交也蓋與後鄭說同擯卽介也依前旅擯注義則賓及主
君各介九人不依擯數俱三辭謂賓之擯辭主君之勞主之擯
又辭之如此者各三而止此云賓主之擯正謂主擯與賓擯交
傳其辭實不自對也云車逆主人以車迎賓於館也拜辱賓拜
謝辱也者先鄭意此爲賓入國以後主國君親逆於館之事拜
辱亦謂拜其親迎之辱與郊勞不相冢後鄭則以二者並爲迎
謝郊勞二說不同後鄭爲長賈疏云後鄭不從者此直是備三
勞旣未至國何有輒迎實於館乎云立謂交擯者各陳九介者

賈疏云以其在道俱不爲主故無五擯之事故各陳九介也云
使傳辭也者對旅擯不傳辭親禮所謂傳擯也凡賓禮兩君相
見則交擯傳辭天子待朝覲諸侯不純用臣禮故亦傳辭親禮
云嗇夫承命告于天子注云嗇夫蓋司空之屬也爲未擯承命
於侯氏下介傳而上上擯以告天子天子見公擯者五人見侯
伯擯者四人見子男擯者三人皆宗伯爲上擯又聘禮注云天
子諸侯朝覲乃命介紹傳命耳其儀各鄉本受命反面傳而下
及未則鄉受之反面傳而上又受命傳而下亦如之此郊勞交
擯陳九介使傳辭與覲禮略同但天子受朝於國陳五擯此主
君勞賓於郊則陳九介與彼小異耳凡擯介之數爵尊者多爵
卑者少行禮之時又以遞傳爲文蓋非第致敬於主君在賓亦

自有得申之隆禮故兩君相見用交擯其陳位與旅擯亦同但旅擯則上介請事使者自對不傳辭交擯則賓之上介受命於賓而出以次遞傳於末介末介傳於主君之末介主介又以次遞傳於主君之上介上介又受主君之辭遞傳於賓之上介賓上介又傳而入以復於賓此傳辭之法也云車逆拜辱者賓以主君親來乘車出舍門而迎之若欲遠就見之則下拜迎謝其自屈辱來也者此破先鄭說也以主君與朝賓禮敵當迎於大門外明車逆卽來朝之賓乘車出所止之舍門迎主國之君若不敢當其親來而欲遠就見之者既遇而相見則朝賓先下車西面迎拜謝其來勞之屈辱也云至去又出車若欲遠送然主君三還辭之乃再拜送之也者至主君勞禮畢去時賓又

親出門西面拜送之也此賓主禮敵故迎送皆於大門外賈疏
云賓乘車出門就主君若欲遠送之主君見賓送已三還辭之
賓見主君辭遂再拜送主君也云車送迎之節各其以等者據
齊僕說朝覲宗遇云各以其等爲車送迎之節明諸侯相朝禮
亦同皆以其爵之尊卑爲送迎遠近之節亦如大行人職五爵
三等也云則諸公九十步立當車軹也者賈疏云賓主俱立當
軹大行人文云三辭重者先辭辭其以禮來於外後辭辭升堂
者以經三辭文兩見故特釋之先辭在舍門外爲辭禮後辭在
堂下爲辭升也賈疏云按鄉飲酒禮主人取爵降洗賓降主人
坐奠爵于階前辭注云事同曰讓事異曰辭禮升堂是事同不
云讓而云辭者此賓主敵者主人之意欲有受於庭之心故從

事異曰辭是以下諸公之臣等升堂皆云讓依事同曰讓非敵故聘義云三讓而後傳令三讓而後入廟門並事異不云辭者欲取致尊讓之意變文耳又彼記文非正經故不爲例也案賈說非也鄉飲酒注所謂事同曰讓者謂若賓主同升階不辭其升而讓先也事異曰辭者謂主不敢當賓之降而辭其降也依彼義則此注所云辭禮辭升堂者正合事異曰辭之例賈反謂禮升堂是事同失之至辭讓散文亦通故聘義亦以事異爲讓劉台拱云疑後三辭當作三讓既三揖則升堂必矣乃又辭升堂何也案以後諸公之臣相爲國客受郊勞之文校之疑劉說近是致館亦如之館舍也使大夫授之君又以禮親致焉疏致館亦如之者以下皆賓初至國之禮聘禮云卿致館注云致至

也賓至此館主人以上卿禮致之所以安之也此致館禮與彼同惟以君親致爲異賈疏云亦如之者上主君郊勞此親致館明亦如之也凡致者皆有幣以致之致之使若已有然也 注云館舍也者委人注同聘禮注云古者天子適諸侯必舍於大禮廟諸侯行舍於諸公廟大夫行舍於大夫廟賈彼疏謂諸公大國之孤又聘禮記云卿館于大夫大夫館于士士館于工商注云館者必於廟然則此五等諸侯相朝並館於卿之廟也云使大夫授之君又以禮親致焉者賈疏云鄭知使大夫授舍者見聘禮云大夫帥至館卿致之以此知先遣大夫授館也此大夫亦應是卿案賈謂此大夫是卿者待朝君之禮宜隆於聘臣也國語周語云周之秩官曰敵國賓至司里授館彼似通朝聘

言之司里蓋掌宅里之官經不見者或冬官之屬章注以爲里宰非也此注大夫賈謂是卿蓋君特使典司里同授之鄭意未必卽謂司里也**致飧如致積之禮**俱使大夫禮同也飧食也小禮曰飧大禮曰饗饗疏致飧如致積之禮者此賓受館後致之於館也賈疏云上公飧五牢賓始至之禮故致館後卽言之又聘禮疏云致積有幣致飧亦有幣也注云俱使大夫禮同也者賈疏云以其俱小禮不使卿故云俱使大夫禮同也詒讓案俱使大夫謂致積致飧使者爵同人則異也王氏詳說謂此君親致館則致飧與積似當使卿案後致饗饌亦君親致飧雖小禮然不過降饗一等王說於理則通竊疑五積在道致非一次當使大夫飧止一致又在國當使卿爵實不同以其同爲臣致

故禮得相如猶竟勞使大夫遠郊勞使卿其禮亦同也若然注云同使大夫似亦對君親致言之卿大夫渾言不別猶後致饗食亦當使卿而注云大夫上注云大夫授館疏謂大夫亦應是卿諸注文例或略同與云飧食也者飧本爲脯食引申爲凡食物之稱蜀石經作飧夕食也則與宰夫先鄭注同非後鄭義也詳宰夫疏云小禮曰飧者聘禮宰夫朝服設飧其禮有飮腥而無饌奉又饌設不多故鄭聘禮注云食不備禮曰飧是比饗饌爲小也云大禮曰饗饌者其禮比飧爲盛也外饗注亦云致禮於客莫盛於饗詳彼疏及將幣交擯三辭車逆拜辱賓車進荅拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再拜

賓三還三辭告辟鄭司農云交擯擯者交也賓車進荅拜賓上車進主人乃荅其拜也及出車送三請主人三請留賓也三進進隨賓也賓三還三辭告辟賓三還辭謝言已辟去也玄謂既三辭主君則乘車出大門而迎賓見之而下拜其辱賓車乃前下荅拜也三揖者相去九十步揖之使前也至而三讓讓入門也相謂主君擯者及賓之介也謂之相者於外傳辭耳入門當以禮詔伯也介紹而傳命者君子於其所尊不敢質敬之至也每門止一相彌相親也君入門介拂闥大夫中棖與闥之間士介拂棖此爲介鴈行相隨也止之者絕行在後耳賓三揖三讓讓升也登再拜授幣授當爲受主人拜至且受王也每事如初謂享及有言也賓當爲擯謂以鬱鬯禮賓也上於下曰禮敵者

日饋禮器曰諸侯相朝濯用鬱鬯無籩豆之薦謂此朝禮畢饋賓也三請三進請賓就事也主君每一請車一進欲遠送之也三還三辭主君一請者賓亦一還一辭疏及將幣者此謂致餼之明日正行朝禮於廟也將幣亦謂投玉也凡諸侯相朝以命圭與朝天子同史記齊世家索隱引張衡云禮諸侯朝天子執玉既受而反之若諸侯自相朝則不授玉此與經不合不可從賈疏云及至也至將幣謂賓初至館後日行朝禮之時幣卽圭璋也云交擯三辭車逆拜辱者此與郊勞同但前爲朝君受主君之禮賓主互易當主君西面拜朝君東面拜下送賓同賈疏云此並在主君大門外賓去門九十步而陳九介主君在大門外之東陳五擯上擯入受命出請事傳辭與承擯承擯傳與末

擯末擯傳與末介末介傳與承介承介傳與上介上介傳與賓
賓又傳與上介上介傳與承介承介傳與末介末介傳與末擯
末擯傳與承擯承擯傳與上擯上擯入告君如是者三謂之交
擯三辭諸交擯者例皆如此也車逆拜辱者傳辭既訖主君乘
車出大門至賓所下車拜賓屈辱來此也江永云交擯三辭再
辭是主君辭其朝而賓荅之二辭是主君固辭其朝而賓又荅
之仍有主君許之辭當傳自主傳至賓者四自賓傳至主者三
也案江說是也疏謂賓主皆止三次傳辭說未備云賓車進荅
拜者賈疏云賓初升車進就主君主君下賓亦下車荅主君拜
也云三揖三讓者此揖讓在大門外時讓謂讓入仲尼燕居云
兩君相見揖讓而入門是也至雉門時讓入亦同賈疏云主君

遙揖賓使前北面三讓入大門也云每門止一相者賈疏云既入門迴而東至祖廟之時祖廟西仍有二廟以其諸侯五廟始祖廟在中兩廂各有二廟各別院爲之則有三門門傍皆有南北隔牆隔牆皆通門故得有每門若不然從大門內卽至祖廟之門何得有每門而云門止一相乎故爲此解也案賈說非也此云每門者謂入雉門及五廟之外門故云每門也凡廟諸侯在雉門內天子在應門內鄭賈謂天子諸侯皆在中門亦失之詳小宗伯疏又賈說廟制爲五廟平列是也惟謂廟門之外牆南向無門凡至廟者皆由穆第二廟外西牆閤門入東行凡經閤門始至大祖廟以是說經之每門聘禮疏亦謂此經每門爲據閤門言則非也今定五廟門外有牆中爲總門與大祖廟門

正相直其由大祖廟入昭穆廟乃別爲閤門穆第二廟外西牆無閤門也詳守祫疏云及廟唯上相入者上相相中最貴者大宗伯云朝覲會同則爲上相此諸侯相朝禮雖殺於王亦使卿爲上相也賈疏云相入卽上擯上介須詔禮故須入云賓三揖三讓者此第二次揖讓在朝廷中時讓謂至階讓升仲尼燕居云揖讓而升堂是也云登再拜授幣賓拜送幣者賈疏云授當爲受賓主俱升主人在阼階上北面拜乃就兩楹間南面賓亦就主君賓授玉主人受之故云再拜受幣也賓既受乃退向西階上北面拜送幣乃降也云及出車送三請三進再拜者僎賓訖賓降出主人送至門外以車從既請賓就車又以己車前進至所止之處則再拜以送賓也云賓三還三辭告辟者賓亦不

荅拜也方苞云三辭告辟以主君將拜驤而辟之不欲見主人之拜也主君再拜當在賓告辟後而序於前見賓告辟時主君卽拜而賓已辟然後主賓之敬皆曲盡而各得其安也 注鄭司農云交擯擯者交也者先鄭說無旅擯交擯之異謂擯者主客交錯傳辭也案此賓至國正行朝禮則賓陳九介主君陳五擯與前郊勞交擯賓主並陳九介者小異云賓車進荅拜賓上車進主人乃荅其拜也者賈疏云後鄭不從者車逆拜辱已是主人今云車進荅當是客何得主人再度拜故不從也詒讓案先鄭蓋以車逆拜辱爲主君車逆而賓拜其辱故以此荅拜爲主人荅賓之拜也云及出車送三請主人三請畱賓也者賈疏云後鄭亦不從者行朝享禮賓訖送賓出禮既有限何因更有

留賓之事故不從也云三進進隨賓也者謂賓行前進主人亦進從之三請故有三進也云賓三還三辭告辟賓三還辭謝言已辟去也者告辟告辟主君之拜也賓但告辟遂去不荅拜者禮之通例送者拜去者不荅拜鄉射禮賓出主人送于門外再拜注云不荅拜禮有終也是也云玄謂既三辭主君則乘車出大門而迎賓者大戴禮記朝事篇云君拜迎于大門外案大門外謂諸侯庫門外其內卽外朝也禮通例賓主人辭者迎於大門外此卽交擯三辭主君乃出大門迎賓故經車逆在交擯三辭之後大行人注云王始立大門內交擯三辭乃乘車而迎之是天子特來朝諸侯亦同曲禮孔疏謂賓至主國大門外主人及擯出門相接而後交擯傳辭與此經江敘次並迂非也云見

之而下拜其辱賓車乃前下荅拜也者此破先鄭說也主君出門既見賓車則主君先下車拜其辱賓車稍前賓乃下車荅主君之拜也凡賓車止於門外故曲禮云客車不入大門云三揖者相去九十步揖之使前也者據大行人上公朝位賓上之閒九十步也若侯伯則相去七十步子男則相去五十步此三揖在大門外與後庭中三揖有別右曲將北曲當碑之節者不同云至而三讓讓入門也者與後升堂時三讓爲讓升者異也國語周語云在禮敵必三讓曲禮云凡與客人者每門讓於客此讓入門亦謂入大門主君由闌東朝君由闌西皆中門而入此主君三讓則賓亦三辭禮器云三辭三讓而至不然則已蹙是也云相謂主君擯者及賓之介也謂之相者於外傳辭耳入門

當以禮詔侑也者明相卽主君之上擯及賓之上介因事異名耳前注云出接賓曰擯入贊禮曰相故專據擯言之攷聘禮云擯者進相幣又擯者立于闈外以相拜凡言相亦皆專據擯而不及介鄭知此相兼有介者接諸公之臣相爲國客云每門止一相及門唯言相入注云唯君相入客出也相不入矣彼以君相對臣相爲文臣相卽聘介也此經唯云上相不辨賓主明兼有賓相可知故注兩舉擯介也互詳大宗伯疏云介紹而傳命者君子於其所尊不敢質敬之至也者賈疏云此聘義文案彼介紹而傳命謂聘者旅擯法引證此文擯者但紹繼也謂介相繼而陳則交擯旅擯皆得爲紹故此交擯亦得紹介而傳命也案彼注質謂正自相當賓主不敢正自相當故須擯介通情也

云每門止一相彌相親也者每入門時止一人相禮不如在外用五擯九介傳辭者示臣彌親禮彌簡也云君入門介拂闌大夫中棖與闌之間士介拂棖者玉藻文引之者證介隨君入門之節鄒彼注云此謂兩君相見也棖門楔也君入必中門上介夾闌大夫介士介鴈行於後示不相沿也君若迎聘客擯者亦然孔疏云闌謂門之中央所豎短木也棖謂門之兩旁長木所謂門楔也又引崔氏皇氏云君必中門者謂當棖闌之中主君在闌東賓在闌西主君上擯在君之後稍近西而拂闌賓之上介在賓之後稍近東而拂闌大夫擯介各當君後在棖闌之中大賈疏云君入門不言所拂者朝君入由闌西亦拂闌不言之者君特行不與介連類故不言也介拂闌者上介隨君後與大

夫士介自爲鴈行於後也王念孫云疏云朝君入由闌西亦拂闌與鄭玉藻注君入必中門不合其說甚誤君入當棖闌之間未嘗拂闌也案王說是也凡門皆兩棖一闌闌在兩扉之間當以崔靈恩皇侃說爲正孔穎達李如圭楊復江永凌廷堪張惠言孫希旦胡培翬朱大詔並從之賈聘禮疏獨謂闌有二分列東西非也凡入門近闌則拂闌近棖則拂棖若中門則當二扉之中於棖闌皆無所拂依玉藻注義則君與大夫介入門皆列正相當賈此疏謂君亦拂闌則與上介行列相當不當棖闌之間其誤明矣云此爲介鴈行相隨也者卽玉藻注所云大夫介士介鴈行於後是也蓋入門時君特在前上介相禮者則先眾介拂闌而行次介以下則繼上介後相鴈行以次而入也玉藻

孔疏云廬行參差節級云止之者絕行在後耳者明非終不入特絕行在後不相隨俱入耳賈疏云知不全入而爲絕行在後者以聘禮介皆入廟門門西北面西上故知此君介亦入門門西北面西上可知故云絕行在後後亦入廟也云賓三揖三讓讓升也者此三揖卽入門後庭中三揖也讓升者別於前三讓爲讓入門也聘禮說歸饗餼之禮云大夫奉束帛入三揖皆行至于階讓大夫先升一等注云讓不言三不成三也凡升者主人讓於客三敵者則客三辭主人乃許升亦道賓之義也使尊主人三讓則許升矣據彼注則賓上敵者主人一讓賓一辭主人再讓賓再辭主人三讓賓三辭主人乃先升以道賓此諸公賓主相敵則亦三讓而主人先升也云登再拜授幣授當爲

受者授受聲類同鄭意下文云賓拜送幣則此不當云授幣且授幣與再拜文相屬再拜屬主君則授幣非指賓授玉可知故必破授爲受也云主人拜至且受玉也者釋再拜之義大戴禮記朝事篇云北面拜謁所以致敬也卽此云每事如初謂享及有言也者後注義同朝畢必有享卽大行人云廟中將幣三享是也有當據聘禮文詳大行人疏云賓當爲賓者謂賓亦如之之賓當爲賓聲類同也段玉裁云以賓爲賓古文假借也聘禮少牢饋食禮賓字亦多作賓依說文賓賓同字皆訓導也而鄭君說禮損爲導賓爲禮賓分別與許不同云謂以鬱鬯禮賓也者謂與大行人職王禮諸侯事同而文異朝事記亦云賓而禮之是也今攷以鬱鬯禮賓謂之賓賓猶敬也此與大司徒賓興

及鄉大夫與賢者能者以禮禮賓之義同鄉飲酒禮以酒獻賓朝覲禮以鬱鬯裸賓二者通謂之禮亦通謂之賓足相比例似不必讀爲賓也云上於下曰禮敵者曰賓者賈疏云大行人云主禮再祿而酢之屬是上於下曰禮此諸侯云賓是敵者曰賓也凌廷堪云凡賓主人行禮畢主人待賓用醴則謂之禮不用禮則謂之賓士昏禮納采問名禮畢請醴賓注醴當爲禮此女父禮賓也聘禮聘享禮畢請禮賓此主國之君禮賓也皆用醴又聘禮郊勞禮畢賓用束錦賓勞者又夫人使下大夫勞賓之如初又歸饗饋畢出迎大夫注賓出迎欲賓之又下大夫歸上介饗饋賓之兩馬束錦又夫人使下大夫歸禮畢賓賓之乘馬束錦上介賓之兩馬束錦此聘賓及上介賓主國之使者也覲

禮郊勞畢侯氏用束帛乘馬僎使者又天子賜舍畢僎之束帛乘馬又賜侯氏車服畢僎使者諸公賜服者束帛四馬僎大史文如之此皆侯氏僎天子之使者也皆不用醴案凌說甚析但此經之僎爲禴禮禮經之僎爲幣馬事實不同鄭此注之意蓋謂此經字雖作僎實與禮經之禮相近但以尊卑文異其與禮經之僎事固不相涉也若然此注之禮卽禮經之禮而僎非卽禮經之僎不必援彼釋此後注云禮以醴禮客卽用禮經義也引禮器曰諸侯相朝灌用鬱鬯無筵豆之薦者證僎不用醴而用鬱鬯也孔疏云謂五等自相朝朝享禮畢未餐食之前主君酌鬱鬯之酒以獻賓示相接以芬芳之德不在散味也云謂此朝禮畢僎賓也者禮器下文又云大夫聘禮以脯醢僎禮相對

爲文明此卽指朝畢僎賓之事云二請三進請賓就車也者主君送賓至大門外則請賓就車如是者二也云主君每一請車一進欲速送之也者此車謂主君之車主君每一請則主君之車亦一進示欲乘車遠送賓也云二還三辭主君一請者賓亦一還一辭者浦渚云者字當在三還三辭下阮元云疏引注請下無者當如浦說案浦阮校近是賓出大門向外行以主君送請不敢徑行故主君一請則賓還面向內辭之也致饗餼還主饗食致贈郊送皆如將幣之儀此六禮者惟饗食速賓耳其餘主君親往親往者賓爲主人主人爲賓君如有故不親饗食則使大夫以酬幣侑幣致之鄭司農云還圭歸其玉也故公子重耳受飧反璧立謂聘以圭璋禮也享以璧琮財也已聘而還圭

璋輕財而重禮贈送以財既贈又送至於郊疏致饗餼還主饗
食致贈郊送者此行朝禮後在館及行至近郊之禮凡五等諸
侯相爲賓饗餼饗食之數並詳掌客職此饗食亦豕致爲文與
麥餼還主皆致之賓館致贈卽於郊與送禮相將經以君親行
故文特致詳也云皆如將幣之儀者亦謂交損及迎送辭受揖
讓之儀略同其節次細別則異也 注云此六禮者惟饗食速
賓耳者惟蜀石經宋大字本作唯字通此謂饗食正禮行於廟
則使卿咸速賓於館主君不親往也方苞云注非也冠禮之賓
儕輩也鄉飲酒之賓鄉大夫所治部民也主人猶親速況敵體
之國君乎案方說較鄭爲長鄭謂速賓君不親往者以公食大
夫禮及聘禮饗食君皆不親往然彼皆君待臣禮不可以例此

也公食禮云使大夫戒各以其爵注云告之必使同班敵者易以相親敬又云大夫相食親戒速注云記異於君者也速召也先就告之歸具既具復自召之則戒速禮同必以同班敵者相食必親往速無疑矣云其餘主君親往者謂饗餼等四事皆君親致之也唯饗食於廟君親行之而致禮則否大戴禮記朝事篇云君親致雍既還主饗食致贈郊送所以相與習禮樂也雍既與饗餼字通朝事亦據親饗食言也國語周語云周之秩官有之曰敵國賓至膳宰致饗廩人獻餼司馬陳芻餼云官致者廣賅朝聘亦以具送陳設事在有司耳實則以幣致之者君自親其事也云親往者賓爲主人主人爲賓者此主君親至賓館則賓轉爲主人而以待賓之禮待主君也聘禮注亦云賓在公

館如家之義亦以來者爲賓賈疏云見聘禮云君使卿歸饗館又云賓迎于外門外又云大夫東面致命君使卿還玉于館賓迎于外門外不拜帥大夫以入鄭君以此二者知賓爲主人主人爲賓致贈郊送亦然可知也聘禮乃君於臣此兩君敵明主君親爲之矣云云君如有故不親饗食則使大夫以酬幣伯幣致之者明此經饗食亦據致禮故得如將幣之儀也凡此致饗食與聘禮待國客同掌客云上公三饗三食三燕若弗酌則以幣致之是也其不親燕亦有致幣注不言者文不備互詳酒人及掌客疏又據聘禮致幣各以其爵鄭注謂致禮於卿使卿致禮於大夫使大夫此致禮於國君君既不自致則當使孤卿注云大夫者亦謂上大夫也鄭司農云還圭歸其玉也者以聘禮說

還圭亦云還玉後鄭彼注云玉圭也但彼臣聘用琄圭此國君
相朝用命圭耳朝時廟中受其玉上云受幣是也禮畢則主君
親歸玉於賓館據聘禮則并還璋經文亦不具也云故公子重
耳受煢反璧者賈疏云僖公二十三年左傳公子重耳反國及
曹曹共公聞其駢脅欲觀其裸浴薄而觀之僖負羈之妻曰吾
觀晉公子之從者皆足以相國若以相夫子必反其國反其國
必得志於諸侯得志於諸侯而誅無禮者曹其首也子盍蚤自
貳焉乃饋盤飧寘璧焉公子受煢反璧是其事引之者證還圭
之事但彼反璧者義取不貪寶意非還圭故後鄭不從也云玄
謂聘以圭璋禮也者賈疏云聘義云以圭璋聘重禮也謂行聘
禮也云享以璧琄財也者賈疏云貢財貨時用璧琄以致之故

云財也云已聘而還圭璋輕財而重禮者亦聘義文鄭彼注云圭瑞也尊圭璋之類也用之還之皆爲重禮禮必親之不可以己之有遙復之也財謂璧琮享幣也受之爲輕財者財可遙復重賄反幣是也案鄭言此者明朝聘皆有還圭其義同也云贈送以財者說文貝部云贈玩好相送也聘禮注云贈送也所以好送之也左昭五年傳云出有贈賄杜注云去則贈之以貨賄財賄義同詩大雅韓奕云韓侯出祖出宿于屠其贈維何乘馬路車箋云贈送也又使送以車馬所以增厚意也樂記云所謂大輅者天子之車也龍旂九旒天子之旌也青黑緣者天子之寶龜也從之以牛羊之羣則所以贈諸侯也此蓋天子贈上公之禮詩秦風渭陽說康公送晉文公云何以贈之路車乘黃則

侯國自相贈亦有車馬矣云既贈又送至於郊者於舊本並作
丁今依蜀石經正賈疏云聘禮賓送行舍于郊公使卿贈如覲
幣注云言如覲幣見爲反報是贈并送至于郊案朝禮無文故
鄭賈約聘禮爲說亦君親送於近郊與來時郊勞同賓之拜禮
拜饗餼拜饗食鄭司農云賓之拜禮者因言賓所當拜者之禮
也所當拜者拜饗餼拜饗食立謂賓將去就朝拜謝此三禮二
禮禮之重者也賓既拜主君乃至館贈之去又送之于郊疏賓
之拜禮者此賓將行時拜主國之禮於朝也注鄭司農云賓
之拜禮者因言賓所當拜者之禮也者明經言拜禮與下二句
爲目諸公相爲賓授玉後主君當亦有禮祿知此拜禮非別爲
拜祿禮者以聘禮將幣後亦有禮賓而無拜禮明此亦不當拜

周禮正義 禮七十二

卷一百四十八

也云所當拜者拜饗饌拜饗食者謂當拜者止此諸禮其餘燕
羞俶獻乘禽等皆不當拜與聘禮異也云玄謂賓將去就朝拜
謝此三禮三禮禮之重者也者此朝謂庫門外之廷聘禮注云
拜謝主君之恩惠於大門外是也三禮謂饗饌一饗一食三賈
疏云先鄭所說是後鄭增成其義案聘禮饗饌燕羞俶獻之明
日賓皆拜於朝將去又三拜乘禽于朝彼臣故盡拜謝此賓之
拜禮在致贈郊送之下則不及燕羞俶獻乘禽以其君略小惠
將去惟拜其大禮也案聘禮賓三拜乘禽於朝送行舍于郊公
使卿贈若然此致贈郊送在拜禮後今設文在前者欲取如將
幣之儀故進文在前其贈送合在後也云賓既拜主君乃下館
贈之去又送之于郊者下亦當作於蜀石經反各本並誤聘禮

云君使卿贈士送至下竟此國君來朝禮尤重故主國君親下館贈又親送之於郊也但聘禮使卿郊贈後唯有士送于竟更無卿郊送之文此注說君贈於館又別送於郊與彼不同者以上文先云致贈後云郊送明贈不在郊至郊別有送蓋亦君臣隆殺之異也賈疏云鄭以贈送之文在前拜禮在後恐疑顛到故此解之是其次也賓繼主君皆如主國之禮鄭司農云賓繼主君復主人之禮費也故曰皆如主國之禮立謂繼主君者賓主君也償之者主君郊勞致館饗餼還圭贈郊送之時也如其禮者謂玉帛皮馬也有饗陳之積者不如也若饗食主君及燕亦速焉疏注鄭司農云賓繼主君復主人之禮費也故曰皆如主國之禮者說文糸部云繼續也引申之爲往來報復之義故

先鄭以復訓繼也賈疏云後鄭不從者主人禮費既多非賓所能復云立謂繼主君者賓主君也者賈疏云案聘禮君遣卿勞及致館等皆僨僨者報也上注云敵者曰僨故此報主君爲僨云僨之者主君郊勞致館饗餼還主贈郊送之時也者賈疏云案聘禮云賓至于近郊君使卿朝服用束帛勞又云賓用束錦僨勞者君使卿韋弁歸饗餼又云大夫奉束帛又云賓降授老幣出迎大夫注云出迎欲僨之庭實設乘馬賓降堂受老束錦賓奉幣西面大夫東面賓致幣是皆有僨法彼兩臣有僨此兩公有僨可知也若然彼聘禮致館無僨者彼君使卿致館不以幣故亦無僨明此兩君致時有幣合亦僨之也子君有故不能親饗食以幣幣酬幣致之亦無僨鄭彼注云以已太官往還玉

于館及還享雖無束帛文亦當償之矣案聘禮致館賓有幣而無償賈謂無幣非是詳後疏云如其禮者謂玉帛皮馬也有饌陳之積者不如也者皮馬賈疏述注作乘馬阮元云諸本作皮誤詒讓案此謂主君致饗餼時有牲牢米禾薪芻等饌陳之積賓償主君則惟如致幣以報之不報其饌陳之積也云若饗食主君及燕亦速焉者賈疏云聘禮賓不見有饗食速主君者臣於君雖他國亦不敢速君故禮記云大夫饗君非禮是也此兩君卽得其燕食等皆得速主君也案上注云惟饗食速賓故賈意賓饗食主君當亦使人速之賓不親往速燕禮輕於饗食亦不親速可知然依方苞說主君饗食賓當親速則賓饗食主君及燕似亦當親速不必如鄭賈所說也諸侯諸伯諸子諸男之

相爲賓也各以其禮相待也如諸公之儀賓主相待之儀與諸公同也饗餼饗食之禮則有降殺疏注云賓主相待之儀與諸公同也饗餼饗食之禮則有降殺者賈疏云五等諸侯以命數分爲三等其圭璋饗餼饋積步數饋介皆降殺備於大行人掌客其進退揖讓之儀一與公同故云如諸公之儀諸公之臣相爲國客謂相聘也疏諸公之臣相爲國客者以下並國君待聘使之禮賈疏云謂上諸公之臣相聘往來爲國客相待相送之儀此法皆備於下文也 注云謂相聘也者謂奉君命聘問往來爲國客也則三積皆三辭拜受受者受之於庭也侯伯之臣不致積疏則三積者客初入竟之禮也三積通出入言之初入竟時或一積或二積經注無文未知其審賈疏云此謂在道之

禮於路館致之亦有束帛致之云皆三辭拜受者與前諸公受積同案亦當旅擯經不言者文略凡此諸公之臣蓋亦唯有積勞不憚與大行人職待大國之孤禮同經不言不問者亦文略也 注云受者受之於庭也者亦與前諸公受積同受之於舍門內之庭也以聘禮受勞禮約之蓋亦使者入門東面致命客則北面再拜稽首受幣也此諸公之臣凡受禮自郊勞外蓋皆受於庭與受積同詳後疏云侯伯之臣不致積者賈疏云案聘禮以五介又張旛是侯伯之聘聘使者經不云積明侯伯之臣不致積可知但不以束帛行禮致之豈於道全無積乎明有也黃以周云致積致餼皆使卿大夫致之司儀云致餼如致積之禮是其致禮同也其不使卿大夫致而徵者直陳其禮謂之設

聘禮宰夫朝服設殯記云殯不致謂不用致禮非無殯也侯伯之臣不致積與不致殯同亦非無積也聘義云主國待客出入三積自是五等之臣通禮但諸公之臣以禮致侯伯子男之臣不以禮致直使微者陳設之而已其設之之法亦當與宰夫朝服設殯同賈疏說甚通其據東帛言之者用鄭殯不致注其實當依經致皆卿大夫不致而設者土案賈黃說足補注義聘禮無積蓋亦因不致禮殺故文不具耳聘義孔疏謂彼三積專謂上公之臣亦誤會此注不足據也及大夫郊勞旅擯三辭拜辱三讓登聽命下拜登受賓使者如初之儀及退拜送登聽命賓登堂也賓當爲僎勞用束帛僎用束錦侯伯之臣受勞於庭疏及大夫郊勞者此客至近郊之禮也凡聘臣蓋皆一勞聘禮云

賓至于近郊君使下大夫請行反君使卿朝服用束帛勞鄭彼
注云大夫請行卿勞彌尊賓也彼侯伯之臣相聘尚使卿勞則
此諸公之臣郊勞使卿可知云大夫者以卿卽上大夫得通稱
也云旅擯者亦用臣禮也賈疏云旅擯不傳辭賓使各陳七介
而已云三辭者辭郊勞也左昭二年傳云叔弓聘于晉晉侯使
郊勞辭曰寡君使弓來繼舊好固曰女無敢爲賓徹命于執事
敝邑宏矣敢辱郊使請辭是辭郊勞之事但聘禮載受郊勞唯
一禮辭此則有三辭與彼異者或禮文不具抑諸公之臣尊於
侯伯故禮亦彌繇與云拜辱者謂旣三辭客乃出舍門門東西
面迎拜使者外來之辱案聘禮賓再拜勞者不荅拜則此拜辱
使者亦不荅拜可知云三讓登聽命者此謂入郊舍之門及階

聘客三讓大夫三辭而後聘客先升堂聽使者所致主君勞問之命聘禮云勞者奉幣入東面致命賓北面聽命此唯升堂不同其致聽之節一也云下拜登受者尊主君之命故降拜於堂下也據聘禮當北面再拜稽首凡臣與君行禮皆降拜君若待以客禮則辭之然後升成拜凌廷堪謂下文云致饗餼如勞之禮考聘禮歸饗餼大夫東面致命賓降階西再拜稽首卽此下拜也大夫辭升成拜受幣堂中西北面卽此登受也案凌說比例甚瑣若然此亦當大夫辭升成拜乃受經文不具也云賓使者如初之儀者此受勞訖更端復旅擯迎入舍行飭也賈疏云謂使傳命訖禮畢出門賓以束帛賓使者如初行勞時之儀前賓受幣今使者受幣受幣雖異威儀則同敬主君使者也云及

退拜送者僎畢使者退聘客於舍門外西面拜送使者亦不答
拜聘禮受僎訖亦云乃退賓送再拜是也 注云登聽命賓登
堂也者謂聘賓與使者相讓至三則賓先登堂聽命使者隨之
登堂東面致命授幣也堂謂舍館之堂云賓當爲僎者前注同
據聘禮受勞後有僎勞者之禮云勞用束帛僎用束錦者呂飛
鵬云聘禮君使卿朝服用束帛勞此使者勞賓用束帛之證也
又云賓用束錦僎勞者此聘賓僎使者用束錦之證也云侯伯
之臣受勞於庭者賈疏云亦案聘禮賓是侯伯之臣云受於舍
門內是不登堂也詒讓案聘禮郊勞注云不受於堂此主於侯
伯之臣也公之臣受勞於堂彼注亦據此經爲說致館如初之
儀如郊勞也不僎耳侯伯之臣致館於庭不言致飧者君於聘

大夫不致餼也聘禮曰餼不致賓不拜疏致館者此賓初至國

之禮也案聘禮記諸公之臣當館於大夫之廟注云如郊勞

也者賈疏云案聘禮賓至大夫帥至館卿致館此公之臣亦當

然上云郊勞此云如初如初郊勞也案此亦當卿致之司里授

之詳前疏云不餼耳者明唯此不如郊勞也賈疏云聘禮致館

無束帛賓亦無餼如此亦然也案聘禮致館注云主人以上卿

禮致之賈彼疏云覲禮注云王使人以命致館無禮猶餼之者

尊王使也無禮謂無束帛此云以上卿禮明有束帛致亦可知

若然有禮則稱致覲禮不稱致無禮故也據此文侯伯之卿聘

郊勞致館有幣則五等待臣皆同有幣也案聘禮疏說與此疏

不同黃以周云覲禮賜舍餼之聘禮卿致館賓迎再拜卿致命

賓再拜稽首卿退賓送再拜不言償之是不償也鄭此注亦以聘禮決之凡諸公相爲賓及其臣之爲國客致館皆有束帛鄭注郊勞云勞用束帛注致館云如郊勞也不償耳明上國亦有束帛特賓不償使爲異耳疏云聘禮致館無束帛與聘禮本疏違案黃說是也云侯伯之臣致館於庭者於舊本並誤于今依蜀石經正聘禮云大夫帥至于館卿致館賓迎再拜卿致命賓再拜稽首卿退賓送再拜亦無登聽命下拜登受之事故知致館於庭也云不言致餼者君於聘大夫不致餼也者凡聘使至者有餼直設之而已不以束帛致之故云不致也賈疏云案聘禮致館之下卽云宰夫設餼卽此致館下不云致餼故云君於聘大夫不致餼如是五等之臣皆無致餼也引聘禮曰餼不致

賓不拜者鄭彼注云不以束帛致命草次饌飧具輕賓不拜以不致命引之者證君於聘大夫不致命之事及將幣旅擯三辭拜逆客辟三揖每門止一相及廟唯君相入三讓客登拜客三辟授幣下出每事如初之儀客辟逡巡不荅拜也唯君相入客可也相不入矣拜主君拜客至也客三辟三退負序也每事享及有言疏及將幣者此謂致館之明日正行聘禮於廟也賈疏云謂賓在館至將幣將幣亦謂圭璋也云旅擯者賈疏云亦謂於主君大門外主君陳五擯各陳七介不傳辭故云旅擯也案此旅擯與前郊勞賓主皆陳七介異故賈謂主君陳五擯以其既至則主君用擯與在道用介異也聘禮云卿爲上擯大夫爲承擯士爲紹擯鄭彼注云主君公也則擯者五人侯伯也則擯

者囚人子男也則摯者三人此並據大行人天子待五等諸侯
摯數以爲己國待賓之摯數也敖繼公據聘禮但言上摯承摯
紹摯謂諸侯之摯者三人而已不以己裔及朝聘者之尊卑而
異凌廷堪云諸侯之於聘賓不應上同天子敖說似亦可從聘
禮賓問卿下大夫摯是卿之摯者一人大行人職曰凡諸侯之
卿其禮各下其君二等卿摯一人則主君摯宜三人矣黃以周
說同孫希旦又謂上公卿七介則主摯五人侯伯卿五介則主
摯三人子男卿三介則主摯二人案以君臣差降二等數之凌
孫說似皆可通經既無文姑並存以俟攷云三辭者賈疏云前
却勞三辭辭其以禮來於外此三辭辭其主君以大客禮當已
詒讓案聘義云三讓而后傳命三讓而后入廟門三揖而后至

階三讓而后升所以致尊讓也鄭注云此揖讓主謂賓也三讓而後傳命賓至廟門主人請事時也賓見主人陳擯以大客禮當已則三讓之不得命乃傳其君之聘命也三讓而后入廟門讓主人廟受也黃以周云據鄭彼注傳命前之三讓卽司儀之三辭故賈疏三辭卽用鄭彼注以爲說散文辭猶讓也但鄭注聘義三讓主賓言注司儀三辭又指主人言各據一偏案黃謂此疏本聘義注義是也然賈說實非鄭惜此三辭當據主擯言之左文十二年傳秦伯使西乞術來聘襄仲辭王亦云主人三辭是其證也綜校後鄭前役注義似亦與聘義注義不同蓋此章三辭鄭無釋者明其與朝禮同前朝禮將幣節三辭亦無釋者明其與致積勞郊勞同皆冢上而省也前朝禮致積郊勞三

辭注並主內爲文辭爲辭外來之禮此注既不用釋則鄭不以爲賓辭客禮當已明矣江永謂此三辭爲主人辭不敢當而賓對席疏謂辭其以客禮當己之誤是也又攷聘義三讓文三見此經及聘禮唯有讓升餘二節並未見彼先云三讓而后傳命則傳命在三讓之後彼注謂三讓不得命乃傳聘命此經云旅擯三辭三辭已是傳命則非彼三讓亦明矣又以鄭意推之蓋擯介將陳而未就位之前有讓擯之節不得命而後各就位傳命三讓之禮細於三辭故此經不載至聘禮則公出迎以前無辭文而辭玉則在賓反廟門時又無三辭之文並與此經小異或大門外與廟門外各有三辭兩經詳略互見與若如賈說則客辭擯而主竟不辭聘有是禮乎云拜逆客辟者主君迎賓於

周禮正義

禮七十二

卷一百四十九

大門內也公食大夫禮注云不出大門降於國君賈疏云謂三辭訖主君遣上摯納賓賓入大門主君在大門內南面拜賓奉君命屈辱來見已客辟不受拜者使者奉君命來不敢當拜故逡巡辟君拜也云三揖者卽聘禮云公揖入每門每曲揖是也云每門止一相及廟唯君相入者廟亦大祖廟也聘禮云不腆先君之祧旣拊以俟矣注云諸侯五廟則祧始祖也是亦廟也言祧者祧尊而廟親待賓客者上尊者賈疏云與前諸公少異彼是兩君故云唯上相入則兩君摯介各有此上相亦不入故據君而言也云三讓客登者卽聘義之三讓而後升也謂至階主君讓賓升賓又讓主君如此者三主君則先升故聘禮云至於階三讓公升二等賓升四楹西東面是三讓之後主君賓

先升此上客言之則云客登不論先後也賈疏云案聘義云三
讓而後入廟門三揖而後至階此不言者文不具客登者主君
與客俱登據客而言故云客登也云拜客三辟者卽聘禮云賓
致命公當楣再拜賓三退負序是也賈疏云主君與客俱登訖
主君於阼階上北面拜拜賓喜至此堂并拜受幣客三辟者三
退負序不敢當君拜云授幣下出者賈疏云授玉於主君也方
苞云聘禮公受玉于中堂與東楹之間賓降出卽此授幣下出
也不敢拜送幣者奉君命以將事不敢當君也 注云客辟送
巡不答拜也者聘禮云公皮弁迎賓于大門內大夫納賓賓入
門左公再拜賓辟不答拜注云辟位送遁不敢當其禮又曲禮
云君若迎拜則還辟不敢答拜注云嫌與君抗賓主之禮案送

巡與聘禮注逡遁字同詳司士疏云唯君相入客臣也相不入
矣者以客是臣禮殺故相不入不入者謂客入之後上相與眾
介絕行在後不與客俱入故聘禮云賓入門左介皆入門左北
面西上注云隨賓入也介無事止於此賈彼疏云司儀及將幣
每門止一相及廟唯君相入注云客臣也相不入矣此介皆入
不同者彼云每門止一相鄭云絕行在後耳非是全不入廟又
云唯君相入者謂前相君禮須入故言之臣相不前相禮故不
言入其實皆入與此同也案此經及廟唯君相入與聘禮文異
故賈彼疏據前諸公相朝注絕行在後之說通之理或然也云
拜主君拜客至也者卽聘禮賓入門左公再拜注云南面拜迎
是也案拜客拜其至之辱也聘禮記贊拜之辭曰子以君命臨

寡君寡君拜君命之辱是也云客三辟三退負序也者賈疏云
案聘禮云賓三退負序注云三退三遠遁也不言辟者以執圭
將進授之此亦執圭將授言辟者儀禮是委曲行事故云將進
不得云辟此周禮事未見據大摠而言故云辟無嫌案賈聘禮
疏謂此經是諸公之臣相聘之禮與侯伯之卿聘於鄰國之禮
少異與此疏說不同此疏爲允云每事享及有言者前注義同
聘禮受幣之後云賓奉束帛加璧享又聘於夫人用璋享用琮
所謂享也又云若有言則以束帛如享禮所謂有言也詳大行
人疏二者皆在將幣之後其禮並同故經以每事該之及禮私
面私獻皆再拜稽首君荅拜禮以醴禮客私面私覲也既覲則
或有私獻者鄭司農說私面以春秋傳曰楚公子棄疾見鄭伯

以其良馬私面疏及禮私面私獻者以下並行聘禮之禮賈疏云此三者皆於聘日行之故并言之云皆再拜稽首君荅拜者稽疑當從大祝釋文作詣下同前將幣爲致君命拜不稽首此禮爲主君禮使臣私面私獻爲使臣以禮見主君故皆稽首以致敬也聘禮賓受禮云升再拜稽首受幣當東楹北面公壹拜賓降也公再拜又賓私覲云入門右北面奠幣再拜稽首又云公北面再拜又記私獻云賓東面坐奠獻再拜稽首公荅再拜皆其事也凡君與臣行禮臣皆稽首詳大祝疏注云禮以醴禮客者聘禮聘享畢後卽云請禮賓是其事也凡禮之通例賓主人行禮畢主人待賓用醴並謂之禮詳前疏賈疏云案聘禮禮客用醴齊異於君鬱鬯也云私面私覲也者據聘禮記郊特牲聘義

及論語鄉黨篇並云私覲荀子大略篇亦云私覲私見也聘禮
既將幣云賓奉束錦以請覲鄭彼注云覲見也鄉將公事是欲
交其歡敬也又問卿之後云賓面如覲幣注云面亦見也其謂
之面威儀質也賈疏云彼於君謂之覲於卿謂之面覲面別此
云私面私覲爲一者以彼文兩見則私覲據君私面據卿此文
不見有私覲直言私面豈不見君直見臣也明此私面主於君
故以私面爲私覲也案賈說是也聘義亦云賓私面私覲面與
覲爲二此經及左傳直以私覲爲私面者以覲面義同通稱故
聘禮小聘曰問面不升注云面猶覲也彼亦以面爲覲又左昭
十六年傳晉韓起聘于鄭私覲於子產以玉與馬是私面又稱
私覲蓋皆散文互通也云既覲則或有私獻者者聘禮記云既

觀賓若私獻奉獻將命鄭彼注云時有珍異之物或賓奉之所
以自序尊敬也猶以君命致之案云或有者私獻不必常有也
云鄭司農說私面以春秋傳曰楚公子棄疾見鄭伯以其良馬
私面者證私覲亦通稱私面也舊本說上衍云字今從宋大字
本岳本刪買疏云案左氏昭六年楚公子棄疾如晉過鄭見鄭
如見王以其乘馬八匹私面見子皮如上卿以馬六匹見子產
以馬四匹見子大叔以馬二匹稱面者以其面亦覲也出及中
門之外同君客再拜對君拜客辟而對君同大夫客對君勞客
客再拜稽首君荅拜客趨辟中門之外卽大門之內也問君曰
君不恙乎對曰使臣之來寡君命臣于庭問大夫曰二三子不
恙乎對曰寡君命使臣于庭二三子皆在勞客曰道路悠遠客

甚勞勞介則曰二三子甚勞問君客再拜對者爲敬慎也
及中門之外問君者此客私覲事畢後君出送客至中門外門
東西面有此問勞之事也賈疏云賓來主爲以君命言聘享是
以先行聘享訖乃始行私相慰問之事是以聘禮注云鄉以公
禮將事無由問也云客再拜對君拜客辟而對者客門西東面
拜對君門東西面答拜客辟又東面對以下君與客拜及問對
位並同聘禮無第二次對文不具也方苞云前對問不恙後對
或別問君之所爲也後曰君答拜前第曰君拜者非答客也問
其君之起居不恙則如親見而拜以致敬也案方說是也聘禮
注謂問君居處何如又引籙伯玉使人於孔子孔子問曰夫子
何爲是問居處兼問所爲之類故使者不唯一次對也云君問

大夫客對者聘禮文同大夫謂客國之卿大夫或執政隆重或與主君雅故皆得蒙咨問不拜而對降於君也云君勞客客再拜稽首君荅拜者聘禮文亦同注云勞以道路之勤此主君又特勞問客故再拜稽首以拜其恩意也曲禮云大夫士見於國君君若勞之則還辟再拜稽首云客趨辟者聘禮云賓出公再拜送賓不顧注云公既拜客趨辟即據此經若然主君尚有拜送之節此經亦不具者不敢當主君之拜故趨出辟之且見不敢勞主君之遠送也 注云中門之外即大門之內也者謂雉門外庫門內也諸侯二門以雉門爲中門庫門爲大門鄭謂諸侯以應門爲中門皋門爲大門失之詳闕人及朝士疏賈疏云聘禮云及大門內公問君故指彼云即大門內也案聘禮云及

大門內公問君賓對公再拜注云賓至始入門之位北面相揖而出眾介亦在其右少退西上於此可以問君居處何如序殷勤也時承摯紹摯亦於門東北面東上上摯往來傳君命南面焦循云聘禮云公出送賓及大門內公問君賓對公問大夫賓對公勞賓賓再拜稽首賓出公再拜送賓不顧司儀云出及中門之外問君客再拜對君問大夫客對君勞客客再拜稽首君答拜客趨辟二文互同中門外卽大門內外朝之地也蓋送至此仍用摯傳命而賓出大門也公在雉門外送至外朝下送出大門也云問君曰君不恙乎對曰使臣之來寡君命臣于庭問大夫曰二三子不恙乎對曰寡君命使臣于庭二三子皆在勞客曰道路悠遠客甚勞勞介則曰二三子甚勞者寡君命臣于

庭蜀石經宋大字本命下並有使字與下文同疑今本批之于
當作於各本並誤大行人注云問問不恙也賈疏云未知鄭君
所出何文或云是孔子聘問之辭亦未得其實也惠棟云襄廿
七年左傳曰仲尼使學是禮也以爲多文辭服虔曰以其多文
辭故特舉而用之後世謂之孔氏聘辭此書漢時猶存故鄭引
之或說非無據也案惠說亦通呂氏春秋異用篇云孔子弟子
從遠方來孔子問之日子之公不有恙乎子之父母不有恙乎
子之兄弟不有恙乎賈引或說疑卽據呂覽推定謂出孔子也
聘禮云君與卿圖事遂命使者此卽所謂君命使臣于庭二三
子皆在也明君與諸臣皆無恙故得親命使圖事於庭凡圖事
在燕朝卽路寢庭也云問君客再拜對者爲敬慎也者以下問

大夫客不拜而對明同君再拜對者爲尊君特示敬慎也致饗
餼如勞之禮饗食還圭如將幣之儀饗食亦謂君不親而使大
夫以幣致之疏致饗餼如勞之禮者賈疏云同使卿威儀進止
皆如上郊勞之禮詒讓案上文郊勞云旅擯三辭拜辱三讓登
聽命下拜登受賓使者如初之儀及退拜送今以聘禮致饗餼
之禮校之大略相同惟彼經侯伯之臣受勞於庭與致饗餼受
於堂不無殊異而此經諸公臣受勞於堂則尤爲符合故經直
云如勞之禮也又案上諸公相爲賓說致饗餼與饗食還圭同
云如將幣之儀而此文又以致饗餼如勞之禮特爲別異者蓋
以詳略變文實則諸禮皆有同有異經或偏舉一隅或綜論大
較義各有當故聘禮說致饗食亦云如致饗明文可兩通不容

周禮正義 禮七十二

十一 禮記 卷之九

五百四十九

泥也云饗食還圭如將幣之儀者聘禮云公于賓壹食再饗燕
無常數上介壹食壹饗賈彼疏據掌客注諸臣用齎不依命數
推之云以此言之公侯伯子男大聘使卿主君一食再饗小聘
使大夫則主君一食一饗若然案掌客子男一食一饗子男之
卿再饗多於君者以其君臣各相望不得以君決臣也案依賈
義五等臣同一食再饗則子男臣有踰君之嫌於等例必不可
通竊意聘臣饗食之數亦當以三等降殺疑當公之卿再食再
饗侯伯之卿一食再饗子男之卿一饗不食於差次或有合耳
此饗食冢上致爲文與還圭並致之賓館則其行禮亦當如上
注云賓爲主人主人爲賓而得如將幣者蓋遇送揖讓之節略
同賈疏云致饗及還玉賓主皆是大夫其將幣主君與使臣行

禮如將幣者蓋不盡如之所如者如旅擯主人皮弁賓皮弁襲
將幣同自餘則別是以聘禮君使卿皮弁還玉于館賓皮弁襲
迎于外門外不拜卿大夫以入大夫升自西階鉤楹賓自碑內
聽命升自西階自左南面受圭退負右房而立是與將幣別之
事也 注云饗食亦謂君不親而使大夫以幣致之者聘禮云
若不親食使大夫各以其齎朝服致之以侑幣如致饗無償致
饗以酬幣亦如之是其事也賈疏云以其與還圭其文同是致
之故知君不親使大夫致之也君館客客辟介受命遂送客從
拜辱于朝君館客者客將去就省之盡殷勤也遂送君拜以送
客疏君館客客辟介受命者以下並客行時之禮君親至客館
送使者使者不敢當君之盛禮故辟而使介於舍館大門外聽

命也云客從拜辱于朝者釋文作客朋云本又作從同案說文
从部云从相馳也從隨行也此經義爲隨從當以從爲正盧文
弨云朋爲篆文從字隸作从釋文本作兩刀誤書內從字甚多
惟此一字作古體賈疏云聘禮曰公退賓從請命于朝公辭賓
退是也詒讓案聘禮賓拜于朝鄭並謂拜謝於大門外則此客
拜辱於朝亦於庫門外門西東面拜朝卽庫門外庭與宮內三
朝異也詳朝士掌訝疏 注云君館客者客將去就省之盡殷
勤也者謂聘禮畢使者將行主國之君就客館省之故謂之館
客聘禮云公館賓鄭彼注云爲賓將去親有送之厚殷勤且謝
聘客之意也又云賓辟注云不敢受主國君見已於此館也此
亦不見言辟者君在廟門敬也又云上介聽命注云聽命于廟

門中西面如相拜然也。摯者每贊君辭則曰敢不承命告于寡君之老。此與彼禮節正同。云遂送君拜以送客者謂君於客館門外東面拜以送客也。賈疏云鄭知君拜送者見聘禮云聘享夫人之聘享間大夫送賓公皆再拜是其有拜詒讓案聘禮又云又拜送注云拜送賓也其辭蓋云子將有行寡君敢拜送鄭蓋兼據彼文明曰客拜禮賜遂行如入之積禮賜謂乘禽君之加惠也如入之積則三積從來至去。疏明日者卽君館客之次日也云客拜禮賜者亦於庫門外之朝東面拜賜主國之摯聽之以告於君君不見也。注云禮賜謂乘禽者賈疏云案聘禮公館賓下云賓三拜乘禽於朝以此知禮賜是乘禽也。詒讓案聘禮致饗餼夫人歸禮及饗食明日客皆拜賜于朝此經無文

唯於行時著拜禮賜之文蓋以其小節略之抑或文得兼含不甚區別要兩經之義大致無迕矣賈聘禮疏引此經而云臨行大小禮皆拜賜是語諸禮皆行時總拜與此注不合亦未知然否云君之加惠也者在致飧及饗餼諸正禮之外故曰加惠云如入之積則三積從來至去者大行人注義同卽聘義云出入三積是也賈疏云入與出各三積故得以後如前以此而言諸侯言出入五積四積三積之類入出各五各四各三者也聘義孔疏說同黃以周云出入三積謂自入至出其所致積有三也故注云從來至去數如此賈孔謂來去皆有此數則注何爲言從至案黃說是也上文三積與聘義文同自通來去言之此云遂行如入之積明致積之禮與入時同耳若其積數則或來

二去一或來一去二總而爲三入與行積數本不相等也大行人五等諸侯來朝惟侯伯四積來二去二積數相等其公五積子男三積來去數亦皆不相等彼經五積四積三積並通出入爲文亦不謂出數如入數也賈誤謂出入數等殊失鄭伯互詳大行人疏凡侯伯子男之臣以其國之爵相爲客而相禮其儀亦如之賈卿也大夫也士也疏凡侯伯子男之臣以其國之爵相爲客而相禮其儀亦如之者此明侯伯子男之臣禮與諸公之臣同也賈疏云其儀亦如之者亦以三等相差七十步七介五十步五介三十步三介小聘使大夫又降殺也論議案聘禮是侯伯之臣相爲國客之禮亦有與此諸公臣禮不同者如受郊勞受館皆於庭之等是也蓋其繁文縛節不能無少差異要

其大致略同故經云亦如之 注云齋卿也大夫也士也者賈疏云諸侯之臣言齋相爲客而相禮者不離三等卿大夫士鄭注掌客云齋卿也則飧二牢饗餼五牢大夫也則飧大牢饗餼三牢士也則飧少牢饗餼大牢也此降小禮豐大禮也以命數則參差難等略於臣用齋而已以此三等相禮也案此鄭賈約言之諸臣有此三等實則每等之中亦自有尊卑細別不同左傳十二年傳云齊侯使管夷吾平戎于王王以上卿之禮饗管仲管仲辭受下卿之禮而還則齋同是卿仍有上下之等也自命士以上爲齋詳大宰疏凡四方之賓客禮儀辭命餼牢賜獻以二等從其齋而上下之上下猶豐殺也疏凡四方之賓客禮儀辭命餼牢賜獻以二等從其齋而上下之者此通論賓客之

禮不限以朝聘也禮儀辭命卽上文儀容辭令餼牢謂致饗餼等賜獻卽禮賜及聘禮記之禽羞俶獻皆是也國語周語云其貴國賓至則以班加一等是班爵同者仍有隆殺之等也賈疏云上經云爵鄭以卿大夫士三等解之此經云二等卽與大行人云諸侯之卿各下其君二等大夫士亦如之大夫下卿士下大夫降殺以兩解之同也云從其爵者以二等降殺從三等而爲之注云上下猶豐殺也者賈疏云爵尊者禮豐爵卑者禮殺以二等爲豐殺也凡賓客送逆同禮謂郊勞郊送之屬疏凡賓客送逆同禮者上文云行如入之積又環人云送逆及疆亦送逆同禮之一端注云謂郊勞郊送之屬者賈疏云經云送逆故知郊勞郊送也郊勞是逆郊送是送尊卑不同此二者一

也案賈說非也尊卑無同禮之理經注之意蓋謂賓客之至逆以此禮送亦以此禮非謂尊卑禮一也凡諸侯之交各稱其邦而爲之幣以其幣爲之禮幣享幣也於大國則豐於小國則殺主國之禮如其豐殺謂贈用束紼禮用玉帛乘皮及贈之屬疏凡諸侯之交者卽大行人所云凡諸侯之邦交問聘朝之等是也云各稱其邦而爲之幣以其幣爲之禮者賈疏云據朝聘所齎享幣大國多小國少禮者據主國賄客還依來者多少而報之注云幣享幣也者賈疏云以其經云稱其邦復云幣明幣是享幣不得據圭璋璧琮也案賈說是也朝聘瑞玉注數有定不得爲豐殺故鄭專據享幣言之聘禮記云幣美則沒禮注云幣人所造成以自覆蔽謂束帛也然此注則謂凡享用束帛加

璧又以皮幣爲庭實同謂之幣猶小行人六幣乘皮馬矣聘禮有夕幣展幣亦並通玉帛皮馬而言云於大國則豐於小國則殺主國禮之如其闕且殺者謂來朝聘者於大國則幣豐於小國則幣殺其主國禮幣則視其來者而報之不以來朝聘之國大小爲異也云謂賄用束紡注云賄予人財之言也紡紡絲爲之今之縛也所以遺聘君可以爲衣服相厚之至又云禮玉束帛乘皮注云禮禮聘君也所以報享也亦言玉璧可知也又云遂行舍于郊公使卿賄如覲幣又記云賄在聘于賄注云賄財也于讀曰爲言主國禮賓當視賓之聘禮而爲之財也賓客者主人所欲豐也若苟豐之是又傷財也亦引此經爲證凡行人之儀不朝

不夕不正其主面亦不背客謂擯相傳辭時也不正東鄉不正西鄉當視賓主之前卻得兩鄉之而已疏凡行人之儀者即見賓客之儀此官豫肄習之而以詔大小行人者也云不正其主面者擯人注云面猶鄉也案面倂之借字詳彼疏注云謂擯相傳辭時也者謂大小行人爲擯相傳辭之儀它若大崇伯舊夫及此官等爲擯相之時亦視此儀也云不正東鄉不正西鄉者釋經不朝不夕朝即東也夕即西也毛詩大雅卷阿傳云山東曰朝陽山西曰夕陽匠人云以正朝夕義亦同賈疏云朝謂日出時爲正鄉東夕謂日入時爲正鄉西云常禮賓主之前卻得兩鄉之而已者謂大小行人隨賓主之前進及卻退宛轉鄉之兩不違背也賈疏謂亦指司儀誤俞正變云不朝不夕不正

其主面亦不背客蓋北面而少偏西南注言常視賓主之前卻得兩向之是也正主面是正向主君擇人云使萬民和說而正王面亦言向王案俞說是也士相見禮云凡燕見于君必辯君之南面若不得則正方不疑君注云辯猶正也君南面則臣見正北面君或時不然當正東面若正西面不得疑君所處邪鄉之彼爲諸臣燕見之儀專主於君與此行人擯相之儀兼視賓主事正相反彼經辯君之南面猶此經正主面也彼注正東面正西面卽此經朝夕也彼注疑君所處邪鄉之猶此注視賓主前卻兩鄉之也兩經義異而正可爲證

周禮正義

禮七十一

禮記集說

卷一百二十七

周禮正義卷七十一終